

海上名人傳

譚延闓



海上名人傳序

吾人同生於此世界同具此圓臚同賦此腦力體力顧或則畢生事業彪炳宇宙昭垂史冊起後人之景仰或則碌碌庸庸虛度一生若是者何哉雖謂秉賦有不同智愚賢不肖各別然人性本善習近性遠且人非生而知之必學而後知雖以孔子之博學多能猶且學如不及猶恐失之從可知偉大之人格彪炳之事業亦惟脩養有素努力不懈而已上海乃國際交通之樞紐人文薈萃之淵藪其間名流學者騷人逸士何可勝數夫沒世無稱君子所疾三代以下惟患不好名好名正不必諱亦不足病惟沽名始可恥耳晚近人欲橫流公理滅絕蓋已惟利是圖不知其餘視虛名直無足輕重所謂一笑罵由他笑罵好官我自爲之一抱此主義以問世者蓋比比皆是此誠足爲世道人心之憂吾友王君博謙有心人也鑒於世風之丕變思有以起敝而振衰又以海上爲偉人名士雲集之所其間超羣軼倫之士事迹之可傳者正多爰有海上名人傳之輯其意蓋欲使頑夫廉懦夫有立志由觀感而興起耳承索序於余并以余之生平事迹彙入其間余平生作事雖俛仰無忤以言名人則吾豈敢顧重違其意勉徇其請并於其書付梓之日略紆所見弁諸簡端中華民國十有八年南京條約八十七週紀念日褚民誼書於上海中法國立工業專門學校

編輯贅言

一 海上縮轂八方冠裳叢萃名公耆德碩望畸人總總林林雲興
鱗香究其人數莫罄莫殫茲編徵求所得僅及百人滄海一珠
吉光片羽遺珍珊瑚網闕憾良多姑以斯刊爲第一集續有輯錄
再當繼版

一 是編之輯蒐羅事實徵索真影僕邀犇走轉輾需時肇始於己
巳中夏齊稿於庚午初春剖梨剝棗非可咄嗟修正校讎又費
日晷溯從開筆以至殺青荏苒流光計將周棋遲濡之咎知不
免已

一 徵列諸公德望地位大抵相率王後盧前頗躋斟酌權謹以冠姓
筆畫爲之次第事循通例非創格也

一 傳文事實半絲採訪輶軒所得容有淆訛閉門造車妄希合轍
脫有舛午尙靳亮原

編者謹識

目錄 以姓之筆畫爲序

王一亭先生 何五良先生 馬承康先生 黃錦鏞先生 聞蘭亭先生
王曉籟先生 沈韞石先生 孫慕韓先生 黃礎玖先生 劉鴻生先生
王衍慶先生 沈燮臣先生 孫梅堂先生 黃涵之先生 劉萬青先生
王向甫先生 余日章先生 孫景西先生 黃幼蟾先生 劉少岩先生
方椒伯先生 狄巽公先生 孫松年先生 黃弈住先生 劉山農先生
毛子堅先生 林康侯先生 倪文卿先生 程霖生先生 樂振葆先生
尤菊蓀先生 周作民先生 張嘯林先生 傅品圭先生 厲樹雄先生
朱吟江先生 姚慕蓮先生 張慰如先生 曾農髯先生 談丹崖先生
朱榜生先生 施省之先生 張澹如先生 葉譽虎先生 錢新之先生
朱壽丞先生 胡筆江先生 張公權先生 葉惠鈞先生 穆蕩初先生
成翊青先生 俞葉封先生 張景文先生 葉山濤先生 盧鑑泉先生
貝潤生先生 俞子章先生 許雋人先生 董綬金先生 黃延芳先生
杜月笙先生 范回春先生 許秋颿先生 鄔志豪先生 關綱之先生
吳德生先生 徐新六先生 陳鎮東先生 楊少川先生 謝蘅窓先生
李偉侯先生 徐慶雲先生 陳介卿先生 楊梅南先生 韓玉麟先生
李馥蓀先生 徐冠南先生 陳雪佳先生 楊潤之先生 聶雲台先生
李煜堂先生 袁履登先生 陳蔗青先生 榮宗敬先生 龐京周先生
宋漢章先生 唐少川先生 陳翼銳先生 趙晉卿先生 顧馨一先生
宋立峯先生 奚萼銜先生 莫子經先生 趙芹波先生 龔景張先生
何東先生 馬玉山先生 盛澤承先生 褚民誼先生 龔禮南先生

王一亭先生肖像



白龍山人小傳

吳昌碩撰

山人王氏名震字一亭浙之吳興人世居吳興北郭外白龍山麓四十歲後乃自號爲白龍山人幼時卽岐嶷異常性蘊藉人與之接談若有夙慧者嗣迫於境經商於滬暇則喜弄翰墨吟詠自適時現偈機書法醇穆雄勁酷類平原畫則山水花木鬱勃有奇氣更喜作佛像信筆莊嚴卽呈和藹之狀寫十六應真種種故實及釋迦成道出山諸相慈悲六道神而明之雖吾家道子再世亦當合十贊嘆是蓋具有夙根印於心而現於一指禪也每鑒於天時之不若人事之流離亟以慈善事業引爲己任繪圖乞振夙夜傍徨不辭勞瘁於是四方之災黎得以存活者無算平日持齋誦佛捐金立寺尤不憚煩山人之所以孽孽者冀有感於世道人心之悟不期而歸依者亦無算山人有偉男子三皆能自立其季傳燾畫有父風莽蒼可喜妙善禪師相之謂其前身乃一頭陀云

王曉籟先生肖像



王曉籟先生小傳

王先生名孝齋字曉籟別署得天浙之嶼人也生時有異徵識者即許爲大器童年應縣試輒冠其曹有神童之目年弱冠游學海上天性豪邁不願爲文字咕囁之書生願爲實業救國之士乃棄儒而商初經理蕭山通惠公紗廠及合義和絲廠滬號以試其鋒處理井然人皆稱曰能聲譽日起未幾創辦上海商業儲蓄銀行旋又創辦中央信託公司均躬爲董事由此國內實業界無不臨風景仰歎爲傑出之人材先生又以中國商業凋殘天然大利足與世界抗衡者厥維蠶絲爰設大來天來泰來三大絲廠以與外商相競爭對於其他國貨工廠亦提倡不遺餘力凡事業之可以利用厚生者幾無不與尤富革命思想曾辦開北商團辛亥上海光復該團實爲首義屢任上海總商會董開北商會長嗣任主席並曾代表上海商界列席開稅會議旋赴廣東調查新政參與北伐籌畫東南響應之計歸爲軍閥所忌懸賞萬元購君君不爲動且益努力兩浙既定滬滬震動君任上海市民代表大會主席團發號施令不崇朝而青天白日之旗飛揚於春申江上當時被任爲上海特別市臨時市政府主席旋被任江蘇兼上海財政委員會常務委員暨畫國府軍需使北伐大業不爲餉糈所困又任勸募二五庫券委員會主席團及基金保管委員會委員全國經濟會議常務委員全國財政會議交通會議委員繼長全國捲菸特稅局旋任財政部菸酒稅處副處長兼江蘇捲菸稅局局長捲菸稅處副處長捲菸煤油稅處副處長現改任蘇浙區麥粉稅局局長先生有大勳於黨國而口不言功其辦理稅收全無官僚氣純用商業化使國用裕而民不困又廉潔自持誓不用造孽之錢性尤仗義樂善凡救災恤貧事業無役不從萬金不吝其最著者於故鄉嶼邑斥資十五萬金建一醫院奉其尊甫之號以爲院名名曰芷湘醫院嶼民每歲獲全者無算先生頻年商業所得贏餘均揮霍於善舉之中旅滬垂二十年交游徧南北義聲薄天下素抱大公主義故自號無我今改無無而天之所以報施者亦厚年未五十有子女二十餘人號稱多子王將來汾陽福壽自可預期公餘之暇提倡藝術化之娛樂習太極拳歌二簧劇寓有益於無益也平日胸懷豁達舉一切艱難憂患之環境皆不足以擾其心終日無戚容長開口而笑曾有仙人臨此判爲第三百九十九尊壽極羅漢轉世論者推爲當代福人第一云

王衍慶先生肖像



王衍慶先生小傳

王先生名衍慶浙江鄞縣人父佐禹公設慎成恆昌成恆昌公等皮號於海上兼任彙福洋行華經理之職固海上商業一鉅子也先生幼失恃年十四肄業上海青年會十六考入聖約翰中學十九升大學皆以體育著於時冠歲後廢箸驚財嘗一任清江恆昌成經理旋襄佐禹公董理彙福洋行事是時海上開埠已久各國商人之質選於是者實繁有徒乃有萬國商團之組織獨我華人弗與列先生恥之號召於商界得團員數百人是為中華隊而先生操演尤勤味爽而起荷槍挾彈驅馳十餘里從事射擊雖大風雪未嘗或間習之期年技果大進方寸之鵠擊之於數百丈外應聲命中中外人士之圍觀者靡不駭其技之神而歎其詣之深也用是團中各項比賽先生輒名列前茅所勝各隊競賽盾英瑞杯美國杯國際賽英艦杯選手賽等無慮數十百次使我中華隊之名凌駕各隊之上者實先生之功為多此誠我國國際之光榮不僅先生一人之勝利矣先生迭任萬國賽槍會委員中華隊射擊教練等職民國十六年擢任中華隊司令中外團員翕然推服生平營業彙福洋行皮業外兼營地產經租建築去年手創彙福地產建築公司事業遍京滬各地性尤好客縉紳之交滿於海內而慷慨好義急人之急綽有古俠士之風以故中外人士翹望其丰采莫不以一識荊州為榮云

王向甫先生肖像



王向甫先生小傳

王先生名榮績字向甫以字行河北省寶坻縣人祖子餘公爲同光時名幕長揖公卿間文名動海內先生生平學問得自祖教者居多父保和公雅擅外交居北平多與各國駐華公使遊授之華語咸以師禮事之先生幼讀書於天津新學書院華英文皆冠其儕服務汕頭海關雖職在權稅而熱心教育歷任四育學校校長並執廣州旅汕學校教鞭循循善誘作育人材甚多不特純盡義務遇校款支絀時且解囊以助焉母太夫人閩治家勤儉閨門以內機杼聲刀尺聲相間而作有敬姜之風岳母太夫人徐思爲中國挽溢利研究花邊一物垂二十載極有心得悉以祕與授先生因設德昌花邊廠於汕頭德生花邊廠於上海徐家匯之士山灣出品之佳中外驚歎先生雖家無餘資而性情豪伉愛朋友如性命有急難乞其援助傾囊無所吝凡知交者莫不佩其俠義云

方椒伯先生肖像



方椒伯先生小傳

方先生名積蕃字椒伯浙之鎮海人鎮海方氏世爲望族先生之大父當上海開埠時卽來滬經營絲茶業負有威名事績載入上海縣志其尊人爲前清教諭曾舉孝廉先生家族大人衆管理甚難君任族長集重任於一身興利除弊百廢俱舉旋來滬貢獻其材智與精神於金融界其辦事之精勤一如在甬時也當清廷廢科舉興學校之際先生捐資興學數逾萬金創辦公學於鎮海自任校長者凡三載時年僅二十有三耳先生又曾任寧波鄞海公學校長同時被任爲寧波教育參事會參事嗣以教育事業猶不足以盡其長復入上海澄衷法政專門學校研究法律民六年業先生爲寧波同鄉會寧紹公所及寧波醫院創辦人先後任各該處董事民七先生任上海東陸銀行經理並任上海總商會會董兼商事公斷處處長民九先生被任爲上海錢業公會及銀行公會董事民十先生任寧紹輪船公司董事華商證券交易所董事民十一當選爲上海總商會副會長時正會長宋君漢章因病辭職遂代行會長職權並兼任上海納稅華人會董事民十二任上海中國通商銀行南市分行經理先生治事於清慎勤之外並以實事求是爲歸爲商界中不可多得之人材云

毛子堅先生肖像



毛子堅先生小傳

毛先生名經疇字子堅原籍蘇州世居上海遂爲上海人前清邑庠生光緒中邑紳李平書姚子讓諸老興辦自治以先生任事幹練推爲總工程局名譽董事其後改任城自治公所市公所名譽董事先生皆悉心擘劃多所匡助時滬南市政次第舉行先生以火政爲當務之急舊有消防隊器具窳敗緩急不可恃乃籌集巨款分區設立救火會購置新式救火車親爲訓練於是南市火政埒於租界地方人士嘖嘖稱之歷任救火聯合會會長十餘年其服務於地方者可謂勞且久矣先生爲人性伉爽而好滑稽每發一語一座率爲之絕倒然謔而不虐人益樂之公退之暇惟以吟詠書畫自遣海上有鳴社者今之月泉吟社也先生爲之祭酒每春秋佳日則偕社中人駕言出遊凡杭州之西湖紹興之蘭亭鎮江之金焦蘇州之鄧尉皆先生之藍田莊竹里館也遊屐所至輒尋觴詠見之者往往疑爲神仙中人所蓄宋元書畫鏗別精審亦自項墨林高江村後所僅見

云

尤菊蓀先生肖像



尤菊蓀先生小傳

尤先生名濟清字菊蓀江蘇無錫東亭人也生於海上幼而穎異畢業於南洋公學學業冠其儕伍尊人葛民公精於墨子機械之學歷任瑞生及安利洋行機械部華總經理慨然以提倡中國紡績事業爲己任滬漢各大紗廠爲葛民公所設計者無慮數十家先生過庭之餘耳濡目染繼承家學故於機械及紡績事業皆富有天才南洋卒業後先生以葛民公年高事繁思有以服其勞遂專心爲之助理一切葛民公倚如左右手旋安利西人以所經理之東方紗廠主任乏人欽先生才聘之總筭其事在職數載百務井井事治人和值工潮澎湃之時而全廠工人咸傾心翕服且有歌頌聲焉歲戊辰先生以葛民公年已周甲左右不可無佐理之人遂辭職仍回安利冀紓老人之勞今年夏葛民公以小極歸道山安利機械部華經理一席遂由先生繼承之說者謂先生器宇英偉豪情雲邁而年方強盛將來造就蓋未可限量云

朱吟江先生肖像



朱吟江先生小傳

朱先生名得傳號吟江江蘇嘉定人先世業儒樂善好施與洪楊亂後家道中落其尊人檀甫公始改習賈然上念兩世好善之德下顧一身失學之悲慨然有建莊設學之志不幸逝世所願未遂先生幼年孤露就商瀝濱待人接物一本謙和營業日上聲望亦日隆然於尊人未竟之志未嘗一日敢去懷也民國四年遂將歷來節縮所餘購置義田祭田學田又於嘉城匯龍潭南建築企雲義莊一所附建國民小學一所其手訂規約族人非學校畢業者屏不得入族會遠地族人無力入學者及有志入高等學校或出洋留學而力有不足者均得津貼學費蓋其宗旨在敦卹而精神則在教育嚴其格以率勵其族子寬其額以普及其鄉人固非尋常義莊偏於養而略於教者所可等類齊觀也地方有司上其事於政府前大總統徐褒以行冠州閩匾額先生泊然不以爲榮也先生又嘗感於我國林業之不振親赴東三省及日本北海道遍走深山窮谷叢林密箐中實地考察以備開採徒以我國交通梗阻致未能展其志殊可惜也先生在滬嘗被舉爲縣商會會長主席總商會議董會董及地方自治市政廳董事等職近任震巽木業公會主席行年逾五十而容貌清矯猶似壯歲殆亦好行其德之報也

朱榜生先生肖像



朱榜生先生小傳

朱先生名斯蒂字榜生藉隸浙之吳興而生於上海生具儁才翹然爲湖社之秀先在上海聖約翰書院肄業於光緒三十年渡美留學入華盛頓中央高等學校大學預科次年考取耶爾大學旋充耶爾大學中國留學生同學會會長耶爾大學萬國留學生同學會書記中國留學生月報經理於西曆一千九百零九年畢業於耶爾大學法政科得學士學位是年秋繞道歐洲回國歲庚戌應學部留學生考試中式法政科舉人辛亥春廷試取列一等十八名奉旨授農工商部郎中武昌起義辭職南歸充闡北學務委員闡北市政廳董事民二辭學務委員領得司法部律師證書執行律師職務先生治律一以鑑空衡平保障人權爲歸海上律界中之祥麟威鳳也聲望既隆各方咸思藉重民十三國務院會聘爲諮議湖社當選爲委員並被舉爲湖州旅滬同鄉會董事上寶兩縣闡北市自治協進會會長及闡北自治會等地方各公團董事美國耶爾大學上海同學會司庫云

朱壽丞先生肖像



朱壽丞先生小傳

朱先生名鈞弼字壽丞江蘇吳縣人弱冠時補邑庠生旋任陸軍部七品京官兼宿衛營秘書後補本部主事充軍制司一等科員籌辦陸軍貴冑學堂兼任守衛處委員後充彰德行營軍需處正軍需官保免補知府本班以道員記名加二品銜鼎革後歷任陸軍部滬寧倉庫長上海鎮守使署軍需課課長調任上海工巡捐總局兼閘北分工巡捐局局長民國六七年間調升浙江安徽湖北全省菸酒公賣局局長及隴秦豫海鐵路局局長兼任交通部財政委員會委員十一年任漢口招商局局長敗歷中外助勞茂著歷年所得勛章獎章甚多如二等嘉禾章二等文虎章等不及備書年來厭棄宦途潛心研佛對於慈善教育事宜贊助不遺餘力海上同志以先生政績昭著聲譽閎碩電懇滬滬籌辦閘北水電事業自閘北水電公司成立後即任該公司辦事董事近因閘北水電不敷供給已籌集鉅股復在張家浜建設新廠營業既佳而人民之受惠者不可勝數追溯該公司之改革及今日所得之結果爲社會創事業爲國民謀幸福首任其勞者蓋舍先生莫屬焉

成翊青先生肖像



成翊青先生小傳

成先生名靜生字翊青號穉漱江蘇寶應人祖孺爲前清文學大家博洽天文兼治禹貢貫通漢宋學派爲一脈著述甚富列傳國史父聲譽擅古文詞爲同光間江南才子之一官直隸靈壽適辛丑八國聯軍攻京師各郡縣率滿大吏廷雍檄飭禮待冀免騷擾遂所至靡然延及靈壽聲譽獨以辱國事仇爲恥投井死絕命詩有屈己全民命捐軀表素懷之語謹恭恪建祠崇祀先生少肄業於尙取學社及出任以簡任職留蘇任用少有大志善屬文家仇國恥積憤胸中著國恥錄於申張國權關稅自主論之絕痛又宅心仁勇常以禦災捍患爲己任民十江北大水運河岌岌將崩決先生集同志疊土加掃夙夜搶險危立水際與宏濟巨浪相爭持水且沒脛不稍懈卒得保持鄉人德之馮煦倡義振十餘年豫皖直魯浙蘇等行省或棹振或辦工先生靡役不從廢癢忘餐嗜義若渴馮下世復以山東大災與王震黃慶瀾組織上海臨時義振會江北荒旱組織江蘇臨時義振會咸能救人救溺功歸實濟歷充內務部特派江蘇振務稽查華洋關附委員會委員江蘇省長公署秘書參議顧問江蘇義振會坐辦江蘇振務處處長江蘇防災會顧問上海鐵路稅務局長南京鐵路稅務局長江蘇省政府救濟災荒委員會主任幹事上海臨時義振會常務委員兼振務會委員江蘇臨時義振會常務委員兼事務主任其人秉性剛毅疾惡如仇所辦稅務並能不避德怨除弊務盡處脂不潤環堵蕭然澹如也一時目之爲嚴正之

貝潤生先生肖像



貝潤生先生小傳

貝先生名仁元字潤生江蘇元和人元和貝氏本望族彬彬文學之士輩出洪楊亂後業商者多先生年十六學業於滬上瑞康居傳見其氣宇之不凡也深器之數年學成委以號務先生本精計然術至是出其所蘊力謀發展其任人也量才而器使其治事也網舉而目張不數載凡通都大邑分肆林立會歐戰起營業更蒸蒸日上幾有一日千里之勢同業之中推巨擘焉然先生之意不以利己爲己足而以利人爲所歸嘗慮同業之渙散無團體也乃與丁鄒諸前輩登高一呼衆山皆應九業洋貨公會遂告成立不特此也先生嘗兩任商會協理一任全國商聯會副會長屢任洋貨公會總董及平江公所總董蘇州旅滬同鄉會會長海上爲東南大埠華洋雜處人品不齊雀角之爭無日無之而先生裁之以義斷之以公一言之下無不渙然此蓋由於先生律己者正故人之信之者亦深也他若設幼稚院以惠孤寒建平門橋以利交通施衣食以賑窮黎助醫藥以療貧病師范文正之贈族則建立義莊廣衛文公之惠工則勦辦紗廠近自蘇浙遠及陝甘凡有義舉無役不從其樂善好施之懷誠一本於天性雖政府崇德報功疊有旌賞先生視之轉蔑如也抑先生尤有不可及者海上繁華甲全國商賈之家一經豪富鮮不築金屋藏嬌娃酒食游戲相徵逐聲色犬馬以爲樂獨先生居安思危處豐守約貧賤不易其志富貴不動其心生平不蓄姬侍不作狹邪游持躬勤儉歷六十年如一日求之晚近憂乎其難當此世道日衰人心日墮如先生者亦可風矣

杜月笙先生肖像



杜月笙先生小傳

杜先生鏞字月笙江蘇上海浦東人慷慨任俠能急人之急於友朋匱乏時雖寫裝貨驂無德色以是爲世所稱民國十六年上海清共之役先生與黃先生錦鏞及張先生嘯林實主其事事成政府酬庸昇以要職先生堅却不就海上爲吾國工商業要區工人無慮數十萬勞資之間時生齟齬得先生一言無不立解蓋先生平日之行誼入人深也先生歷任法租界商界總聯合會主席法租界工部局華董中匯銀行董事長華商紗布交易所理事平民醫院院長淞滬教養院董事災童療養院院長等職並任法租界華人納稅會監察委員公餘之暇輒偕張嘯林先生粉墨登場用寄所抱近先生復鑑於我國文化之衰落與教育之停滯擬斥巨資設書局辦學校然則先生造福地方嘉惠士林豈淺鮮也哉

吳德生先生肖像



吳德生先生小傳

吳先生名經熊字德生浙江甯波人其尊人曾任甯波總商會第一任會長知名士也先生少從父學敏悟過常兒旋入滬江大學改入北洋大學卒業於法科復入東吳大學法學院專攻中國法律民國九年以第一人卒業先生夙抱大志卽於是年渡入密歇根法律學院更求深造民十授法律博士學位以伯特教務長及狄金遜屈累克諸教授之薦列爲嘉尼基世界和平促進會討論國際公法榮譽會員旋赴法入巴黎大學最高法律研究院民十一復赴德入柏林大學請益於著名教授史丹雷博士民十二美國哈佛大學法學院教務長勞氏敦聘先生爲法律研究會會員先生歷游美法德三國研習之暇時有著述投登於各國著名法律雜誌鴻文鉅著闡發精詳彼邦論者至謂支那人之治西洋法律學者自王寵惠博士而後若先生者實不多見云已而應母校東吳大學法學院之聘東裝歸國任國際公法羅馬法等科教授自收回領判權之議起上海公共會審公廨改設臨時法院當局以先生兼通中西法律授任推事未幾調任司法部法律編纂館時臨時法院長盧與原不肯交卸先生貽書院內各同僚勸以須扶擇院長之是否合法任事不宜輒行合作義正詞嚴一時傳誦嗣何世楨繼任院長先生復任推事旋升庭長迨何氏去職先生乃代理院長上海爲通商巨埠華洋雜處訴訟日必數十起先生衡情酌理悉得其平西人之不肯放棄領判權原以華人顛預從事彼藉此以爲口實至是乃無所施其技則亦不得不數服先生法學之淵深與操守之清正也先生頃應美人之聘將赴彼邦講學滬人士之得訊者莫不深惜其去云

李偉侯先生肖像



李偉侯先生小傳

李先生名國杰字偉侯安徽合肥人文忠公之孫也。孕十二月始生。五歲就傅。九歲能文。歧嶷露頭角。器落有大志。文忠公極所鍾愛。光緒辛卯。文忠公薨。仲彭公以毀殉三年。服闋。襲一等肅毅侯爵。充委散秩大臣。漢人得此。二品滿差。異數也。年少老成。當時諸元老。甚相契重。未幾。宿衛三海。典禁軍。復出爲廣州副都統。期年內。調蒙旗都護。先生目光遠大。建議爲滿州軍隊。初設工廠。多處復播荒地。以兵工開墾之。欲使軍人皆能自謀生活。不必仰賴國家。給養經營年餘。改授文職。任農工商部左丞。未竟全功。論者惜之。君以立憲國家。應從事於建設。乃條陳開採礦產及振興工商各種計畫。畫并請改良軍制。統一軍備。舉辦團練。整頓警察。保護商業。調查戶口。設立國有學校。以造就模範人才。釐訂印刷法規。以助新聞事業之發展。皇皇大文。一時遠近傳誦。比於賈誼。天人三策。惜清廷已屬末運。竟不能用。時北洋大臣端方驕蹇跋扈。朝右側目。莫敢撻其鋒者。會者欽太后奉安。東陵瑞端。竟擅派技士竊登寶城。攝影依律大不敬。先生飛章劾之。端坐是奪職。而先生直聲振天下矣。旋被命爲駐比利時欽差大臣。與比政府交涉事項。力主採中文。剛毅不屈。中外稱之。曾與比王議。劫海運以開吾華國外航業。未及舉辦。而革命軍起。其時風聲鶴唳。留學生經費斷絕。留比學生盼款之急。有若燃眉。君慨解私囊。以接濟之。數逾巨萬。是時駐英德法奧各國公使館人員及留學生。莫不窮蹙海外。獨駐比公務人員。不致枵腹顛連。保全國家體面。留比學生。得以安然歸國。現多躋高位。爲國宣勞者。皆先生之力也。民二得代肅裝回國。避迹滬濱。閉門侍母。民五。招商局選爲董事。再連任。民十三。被選董事。長招商局。自歐戰後。船隻老朽。商業失敗。然猶能措拄至今。不至破產者。先生維持之功。實非淺鮮。先生雖生長富貴。少年得志。然無絲毫統緒驕傲之氣。且周知民間疾苦。對於社會慈善事業。不厭不倦。紅十字會。助力尤多。本年被推爲紅會籌賑會委員。長適值陝甘兩省奇災。先生所夜籌畫。不遑。幾成災黎賴以全活者。如恆河沙說者。謂先生克蘇祖澤。李氏子孫。與戚未有艾云。先生慨世道陵夷。科學日盛。念東方文化。不可湮滅。爰與東方各國同志。合組一東方文化學會。暫設總會於法京巴黎。解囊經營。以期保存國粹。派遣會員多人。分往五洲。擔任宣傳。外邦名人學者。入會日多。將來文化事業。普及全球。得先生努力先導。必有鉅大成績。餉我國人也。

李馥蓀先生肖像



李馥蓀先生小傳

李先生名銘字馥蓀浙江紹興人早歲肄業於紹興中學及杭州蕙蘭中學旋東渡日本求學以期深造返國時適值辛亥鼎革先生被聘爲浙江財政廳顧問未幾改任浙江銀行上海支行經理先生出其所學從事改組更名爲浙江實業銀行復參照歐美新法創設商業儲蓄部以提倡公共儲蓄更附設國外匯兌部以經營金融上之進出口事業自是該行營業蒸蒸日上基金驟增至二百萬元之多先生遂將該行官股退還而完全改歸商有焉先生復鑑於歐美銀行靡不夏屋渠渠以壯觀瞻乃於滬上漢口路江西路轉角購地自行建築大廈以資擴充該行業務及落成杭城總行亦遷滬營業焉先生旅滬二十年無日不努力於銀行事業且與銀行界要人組織上海銀行公會至今屹然爲中國金融界之有力團體先生實與有力也先生現任浙江實業銀行董事兼總理更兼中國交通上海各銀行董事與錢新之陳光甫諸先生並爲滬上銀行界聞人先生爲人和藹善與人交且性情伉爽仗義疎財平日於慈善教育等公共事業皆能熱忱贊助以故滬上無論識與不識莫不知有李馥蓀先生其人

李煜堂先生肖像



李煜堂先生小傳

李先生煜堂廣東台山縣人早年經商美洲回國後在香港創設金利源南北行持身接物一秉至誠旋倡辦中國保險事業如聯益公司聯泰公司上海聯保公司中國康年人壽公司均充主席及總理要職自留美時深惡帝王專制政體因投身同盟會於會務多所贊助泊辛亥起義被推爲廣東財政司苦心籌畫應付軍需六閱月後以諸事稍有頭緒潔身引退專肆力於光復前手創之保險事業國內各大商埠及南洋羣島均先後設立分公司營業蒸蒸日上又創辦香港廣東銀行其廣州上海暹羅紐約漢口各分行均一手先後設立上海與先施永安鼎足而三之新新公司先生亦爲勸辦人並被舉爲董事嗣因考察銀行與保險事務遠赴歐美遊歷凡十有餘國歸以見聞所得著有游記一冊貢獻於社會生平以慈善爲懷凡公益事無不樂予贊助尤熱心教育如嶺南農科大學廣州市公醫院均會慨捐巨款今先生春秋已高而精神矍鑠尤時以振興實業及勵行善舉爲職志云

宋漢章先生肖像



宋漢章先生小傳

宋先生漢章浙之餘姚人也生于福建建甯縣父業麟于闈因遂家焉光緒七年始回故里考入中國電報局事閒有暇利用餘晷攻英吉利語文光緒二十八年改入海關越二年調甬海關供職翌年辭職復入電報局任收支旋升會辦光緒二十六年始從事銀行業務先入中國通商銀行三十二年奉召赴京創辦北京儲蓄銀行隸屬於度支部時大清銀行正在清理時期先生奉度支部命來滬清理能於極短時期即將全數股本還諸股東者先生之力也事後助陳錦濤氏創立中國銀行被任爲滬行行長于是經之營之基本日固民國五年袁政府下令停止兌現先生奉令後以一旦停兌全市金融必致擾亂毅然抗不奉令市面賴以無恙而先生苦心締造之滬行亦得保全焉先生爲人小心勤慎自奉菲薄言行合一臨事不亂銀行界均奉爲先進曾被舉爲上海銀行公會會長總商會會董中國紅十字會董事婦孺救濟會董事浙紹會館董事民國五年被選爲總商會會長辭不就民國十二年又當選始勉任焉嗣以春秋已高潔身引退深居頭養不輕出云

宋立峯先生肖像



宋立峯先生小傳

宋先生名學禮字立峯家世居川沙之大灣鎮爲閩鎮之甲族先生生而神駿讀書於梵王渡聖約翰大學成績優異有辦事才富於責任心校中遇有課外組織均被推爲主幹雄於辨凡中英文辯論會詞鋒嶽嶽同學咸爲折服性好動戶外運動無一不精以故體育冠其儕善騎馬與賽長獲雋名動中外萬國體育會中國賽馬會咸任董事兩會事無巨細非先生不集實爲中堅人物焉其尊人搢渠公爲瑞記華總經理者垂二十年忠誠和藹中外交欽歐戰起瑞記改名安利搢渠公仍握總樞無何搢渠公捐館舍先生承其業以一身縮五六職悉能措置裕如更設計辦辦公共汽車精力之富至爲可驚公共汽車得有今日之成績皆先生手創之勞也漢口第一紗廠樹規極宏浙江興業銀行與安利洋行均投資甚巨以頻年經理失宜致遭折閱廠基已在飄搖風雨中中外協議非仗先生之才不克奏挽回之績因公同殷勤勸駕先生遂於今夏作武漢之游以先生之繁材理此琴絲如烹小鮮將來成績可以操券亦當如在灑賽馬時博得采聲不少也敬於先生此行祝之先生仰承先志喜爲公衆事業尤喜成人之美曾在其本鄉設商業學校築公墓辦有軌長途汽車皆不惜出全力以爲提倡云

何東先生肖像



何東先生小傳

何東爵士廣東台山縣人生於香港年十二入香港中央學校以勤敏過人舉高級班長年十七入廣州海關供職二年枳棘棲鸞無由孟晉改入怡和洋行充華副經理三年後港粵保險公司聞其名欲聘任為經理兄何福勸阻之無何晉華總經理任事六年多病告退薦其兄何福先生以繼自此以來爵士商業經驗愈富隆隆日上以至於今一躍而為香港一大富翁香港商人無不以爵士之言行為規臬爵士心慈而好善公益事業無不慨然樂從尤熱心教育如捐築九龍英文學校洵為偉舉時值歐戰起爵士參與戰捐及賑濟名譽益闢爵士之投資佔大股者為匯豐銀行與黃浦船塢公司等又歷任香港電氣公司電車公司船塢公司地產公司開墾公司廣澳汽船公司渣甸輪船公司廣州火險公司金興機織公司各總理於此可見其經商之成績西曆一九一五年曾任香港治安法官政聲卓著英皇喬治授與爵士中國袁黎徐諸總統亦均先後授以勳章聘為名譽顧問爵士在港常參與民政凡事有利與華人者必力為之英太子遊港得被舉為歡迎委員三年前香港海員大罷工爵士不辭勞苦出任調停卒以擔任發給海員罷工時之半薪風潮始息此事港人至今不忘爵士曾遊歷各國調查實業深習歐美風化歸而以科學方法整理其各種營業營業益形發展年來國內兵事不息爵士時以提倡和平為懷近治第於海上之西摩路時來小駐江浙人士咸願一瞻丰采焉

何五良先生肖像



何五良先生小傳

何先生名朝駿字五良別署無量居士浙江上虞人先代以累葉書香世其家迨尊人德鑑公始改營商業以生寡食衆家况清貧先生年十二尙未能就外傳每見鄰童就塾輒暗自歎德鑑公憐其志慨然曰家雖貧子孫書不可不讀勉具束脩令謁師先生天資敏慧過目成誦甫年餘學大進會母太夫人病目不得已廢學侍疾暇仍自脩不倦年十八肄業於上海商務印書館卒業後麟章公司聘爲經理時年方二十三歲也未幾麟章以時局之影響而輟業遂重進商務二十七歲改就上海印刷公司之聘洎今十有餘年公司之業務既蔚爲大觀先生之聲譽亦干雲日上海上印刷界無不知何五良其人皆由忠勤誠實衆望允孚有以致之先生雖起家艱困然慷慨性成營業所獲泰半用諸公益提倡教育贊助慈善年斥數千金不吝同鄉有以緩急請者罔不量爲扶助故進益雖豐而家除平屋數楹別無旨蓄至其孝友之篤鄉里尤傳爲美談既獨償父債專養老母復對於已斷財產關係之弟兄躬被其累口無怨言又代償其虧負擔養其妻孥當此倫常夷數道德淪亡之時如先生者可以風薄俗矣

沈韞石先生肖像



沈韞石先生小傳

沈先生名寶昌字韞石浙江紹興人紹興沈氏世爲名族先生伯兄諱銘昌仕至山東巡按使國史有傳仲兄其昌迴翔法界蜚然有聲介弟爾昌亦屢膺繁劇英英俊彥萃於一門先生年二十有三卽舉孝廉時清廷厲行新政乃入京師大學肄業光緒三十二年奉委京師審判廳審判官以決獄廉明擢刑部主事民國元年被任司法部祕書長派赴日本考察司法制度歸國以後頗多建議二年冬政事堂成立調任祕書四年外除上海縣知事上海華洋雜處號爲難治歷來任者皆不久罷去及先生至撫循地方寬猛相濟一時翕然頌神明焉八年護理滬海道尹九年授四等文虎章及三等寶光嘉禾章十一年晉授二等嘉禾章十二年晉授三等文虎章蓋駸駸乎將大用矣會十三年夏江浙戰事起浙督盧永祥以何豐林率勁旅駐上海蘇督齊燮元糾四省之衆攻之相持於黃渡瀏河之間者亘數閱月而不能下其地皆上海隣壤也槍砲之聲隱隱可聽一時居民倉黃失措賴先生力持鎮靜滬上秩序始漸安謐迨盧何去國先生亦解職而張允明所部遂以大劫滬南聞矣所以甘棠遺愛至今不衰去思之碑猶高矗於春申江畔也

沈燮臣先生肖像



沈燮臣先生小傳

沈先生名嘉貺字燮臣世居浙之吳興祖嵐屏公以絲業起家洪楊之役挈眷避地來申遂家焉嵐屏公逝世先生之尊人少嵐公繼營絲業娶楊太夫人生先生幼卽就外傳讀書聰穎兼通中西文字襲祖父之餘蔭以經營商業有聲斐然中外交學生平營業之主要注重於實業及對外貿易以期發揚國產挽回溢利曾任第五屆上海總商會董兵工廠總商會保管委員會委員總商會關稅會議委員五卅慘案委員會委員外交委員會委員商品陳列所委員總商會改選臨時執行委員會執行委員其爲社會所倚重如此先生待人接物謙恭和藹如春日之可親又性喜慈善爲之不倦聞北普善醫院舉爲副院長其他各學校醫院亦多擔任董事云

余日章先生肖像



余日章先生小傳

余先生日章湖北武昌人父文卿公會任中華聖公會牧師垂四十年母太夫人執聖公會設立之聖喜而達學校之教鞭父母均係教徒故先生亦篤信耶教幼年曾治中國舊文學應童子試旋入文華學校習英吉利語文及各種科學嗣入上海聖約翰大學在校五年品學冠其同曹畢業後爲武昌文華大學教師其母校也除擔任教課外並創辦月刊建設健身室旋以牧師魯德師博士之助入美國哈佛大學專攻教育科越二年授文學碩士以其提出之論文爲中華舊時之學府頗受大學教務會之贊許故得有獎章及獎勵金宣統二年任北美中華學生會副書記並游歷美國各埠慰問中華留學生次年正月回國受武昌文華大學預科教務長之聘是年夏創設暑期學校武漢民軍起義大學停課組織武漢紅十字會被推爲英文秘書次年被命爲湖北交涉使兼充黎副總統英文秘書旋赴北京參預第一次全國教育會議主英文北京日報筆政民三任中華全國基督教青年會協會演講主任民五赴紐約參預第八次世界學生會議并赴英德俄各國慰問中國留學生次年入農商部供職並任赴美商業觀光團秘書旋繼王正廷博士任中華青年會秘書長民九上海租界納稅華人會推爲工部局顧問民十聖約翰大學贈君文學博士民十二任全國基督教協會主席後曾一度攜眷遠遊歐美藉資休養基督教徒之文學顯著有功於教育社會者惟先生與馬湘伯先生爲一時瑜亮焉

狄異公先生肖像



狄異公先生小傳

狄先生梁孫字巽公江蘇常熟人父仁甫公喜攻程朱爲一鄉善士在里創設儲蓄局崇善堂採訪貞孝節烈聞於朝者歲以百計先生其季子也六歲入塾慧冠羣兒以第一名游泮助乃翁纂訂虞陽旌表錄年二十八乃翁棄養閉戶治經著有周禮考證一書服闋入都供職部曹嗣以道員分浙旋東渡日本習法政宣統元年得法學士學位曾列舉各國憲政源流條陳政府者凡七次均蒙採納年三十五試於學部成舉人次年廷試以七品小京官派任大理院推事是年冬浙江創辦法院浙撫增奏調爲杭州地方檢察長兼任浙江官立法政學校高等警官學校法官養成所教習門下士三千餘人辛亥起義棄官回里助蘇督首先舉義被任爲南京審判廳長未幾又改任江蘇高等檢察長均辭不就來滬就辯護士業兼執中華法政學校教鞭保護人權昌明法學對於挽回法權不遺餘力曾與楊文涉使威力謀恢復上海公共會審公廳上訴機關曾被舉爲上海律師公會副會長辭不就民十當選江蘇省議員旋推爲議長嗣以某賄選案憤避入都先生在省議會於民生疾苦整頓吏治多所建議而於改良司法廢止大陸派之檢察制更著文痛陳利弊江浙戰後瘡痍滿目先生奔走賑務籌款近五十萬救濟災民其樂善不倦蓋出自仁甫公之遺教也著有約法釋義刑事訴訟精義海上律學士如林而文學淹通如先生者尙不多見云

林康侯先生肖像



林康侯先生小傳

林先生名祖潛字康侯江蘇上海人弱冠舉博士弟子員戊戌政變後知科舉不足救國乃醉心新學尤注重於小學教育庚子冬桐城吳梅孫先生於南洋公學上院中附設小學聘爲主任教員當時上海小學絕無僅有賴先生設施計劃成一完備之小學壬寅年由校派赴日本考察教育六個月後返滬將該校銳意改良卽任校長之職先後凡十年門弟子達千人以上辛亥武昌起義辭去小學職務轉至實業界辦事與南通張季直先生創辦江蘇鐵路任營業所長三年嗣以該路收回國有卸職入京服務於銀行界上海之新華銀行卽爲先生所開辦任經理者數年又轉至中華匯業銀行任經理者數年民國十六年國民軍到滬上海總商會改組被舉爲主席委員從此服務社會事更繁劇辭去匯業銀行職務比國民政府奠都南京凡百設施如財政會議經濟會議交通會議均被聘爲委員上海特別市政府成立又被聘爲市參事會委員嗣以上海總商會奉令整理藉卸仔肩而上海銀行公會以先生爲銀行界前輩聘爲該會祕書長主持一切先生勇於任事心氣和平義務兼職不勝枚舉其中主要者如國定稅則會委員及二五庫券保管基金委員會被推爲常務委員並兼坐辦又如納稅華人會選舉先生爲工部局委員擔任教育及公用專門委員最近全國商會聯合會又推舉先生爲主席委員代表全國商人有痛苦者代爲呼籲有不完備者督促改組有請求者代爲提倡壁畫周詳彰彰在人耳目蓋筆難盡述云

周作民先生肖像



周作民先生小傳

周先生作民籍隸江蘇長身玉立風采秀異幼奇慧肄業於上海之南洋公學爲高材生旋東渡日本求學以求深造學成歸國才名大振當道爭相延致受職於財政部歷試諸艱勝任愉快遂洊升庫藏司司長民五以交通銀行延聘之殷辭財部職進交通銀行既入金融界信譽益大起人望所歸萬流仰鏡民七遂自行發起組織金城銀行資本金五百萬元先生當選爲董事長向來政府財政多倚賴於銀團先生急公義識大體贊助之力尤多疊邀勳獎民八冬授二等嘉禾章民九春晉二等寶光嘉禾章民十秋復晉大綬寶光嘉禾章民十一秋被任全國財政討論會委員先生深明經濟之原理勢聚則力厚而難拔勢散則力薄而易摧時中文兩行以外銀行勢力之最雄厚者爲金城鹽業中南大陸四家先生因勸四行聯盟之議設四行儲蓄庫以厚集金融而鞏固基礎各行皆贊成其議見諸實行由此四行之信用遂如金城湯池樹永久不拔之基而先生之豐功偉烈亦相偕以不朽誠今日銀行界之明星也

姚慕蓮先生肖像



姚慕蓮先生小傳

姚先生名福同號慕蓮浙之嘉興人祖訪梅觀察以樂善好施聞於一時先生少孤幼時已嶄然露頭角出而筮仕由直隸石景山同知保至道員郵傳部咨調奏保授職參議歷充頤和園電燈處提調崇陵陵工監修官上海電政局監理官上海招商局漕務會辦北京電報局總辦等差所至皆能殫心擘劃爲長官所倚昇光復後解組僑滬有朱公居陶之意而當路鉅公爭欲延致之遂又累應陸軍部財政部浙江都督府顧問之聘先生居滬每慨滬上英法兩租界市政良善而我華界獨形窳敗以爲此不第滬人之恥也乃就南市銳意興辦被舉爲上海工巡捐局局長內地自來水公司董事長保衛團團長十餘年來規模大具其後上海縣改爲特別市論募路藍縷之功不得不歸先生矣又於其間服務桑梓任嘉興縣民團團長及商會會長甲子齊盧戰事作嘉邑當江浙之衝鄉人倉皇避兵來滬有至棲止無所者先生爲組嘉興旅滬同鄉會以謀救濟蓋先生篤守訪梅觀察遺教急公好義惟恐後人歷發二等嘉禾章二等大綬嘉禾章二等大綬寶光嘉禾章二等文虎章並累蒙清遜帝及民國總統褒揚樂善好施急公好義等匾額蓋其造福於國人者甚大又不僅惠及鄉人已也

施省之先生肖像



施省之先生小傳

施先生名肇曾字省之浙江杭縣人寄寓江蘇震澤縣前清由知縣保至二品銜江西道員初任駐美使署隨員旋補紐約正領事官歸國後歷充湖北漢陽鐵廠提調京漢鐵路工程總辦滬寧鐵路總辦招商總局董事滬杭甬鐵路總辦後調京漢路南段會辦民國元年奉命督辦隴海鐵路事宜兼任同成鐵路督辦八年全國商會舉爲國際稅法平等會總代表九年晉授一等大綬嘉禾勳章先生少有大志學貫中西初爲外交官折衝樽俎頗具幹才其後歷任交通要差宣勞道路工程者十有餘年規劃精詳操守廉介尤以樽節公款爲急務且善於理財歷次被舉爲銀行董事凡所以調劑金融保持信用者莫不措之裕如故操財政者皆倚以爲重顧善於理公財而拙於營私蓄卅年宦海囊橐尤空平日尤熱心公益如創辦北京中央醫院以惠貧病捐助各學校鉅資以振教育設立施氏義莊以贍宗族而於保存國粹尤爲兢兢嘗與無錫唐蔚芝先生設立國學專修館一時學風爲之不變又嘗獨力捐資刻行十三經嘉惠士林實非淺鮮近年來究心內典頗悟禪機以宏教護法爲己任其接物彌寬而律已彌嚴誠茫茫宦海中絕無僅有者矣

胡筆江先生肖像



胡筆江先生小傳

胡先生名筠字筆江江蘇丹徒人幼而俊偉冠其儕遜清末葉設公益銀號於都門旋入交通銀行擢升經理是時交通銀行方當隆極極感之際先生與楊蔭蓀先生左驂右靳號稱雙秀旋楊君退職南旋先生獨力支柱行事秩然有條民國十年與黃先生奕住史先生量材等發起創設中南銀行在上海開幕被任爲總理先生選於金融之學眼光遠而計畫宏知經濟競爭必合羣而力始厚也乃與鹽業金城大陸三大銀行締聯合營業之約組織四行準備金庫知儲蓄事業適合社會之需要也乃成立四行儲蓄會由是中南銀行發行鈔票遂有充分之準備金其儲蓄會章程存款者得分紅利實足爲儲蓄銀行之模範四行準備金庫總監及四行儲蓄會執行董事兩職先生以一身兼領之衆望翕然慶爲得人同業各銀行如上海金城江蘇典業上海新華等企先生之才重先生之望復爭聘爲董事焉先生性情伉爽不斤斤與人較銖兩亦金融界之異人也

俞葉封先生肖像



俞葉封先生小傳

俞先生名肇桐葉封其字也浙之錢塘人生於山明水秀之區地靈人傑宜其穎悟異常人幼時卽具大志讀書過目輒十行下當弱冠之年值清政不修四海騷然擲筆嘆曰丁茲亂世安用此毛錐爲遂棄文就武考入士官研究所從事於戰守攻取之術投筆從戎流傳佳話先生行將爲班生第二矣有志者事竟成畢業後浙撫馮深器重之昇以都閩之職然先生初志猶未遂也旋馮撫調江西堅邀先生俱辭不獲乃之贛任前路巡防統帶軍符甫握號令嚴明時有三點會匪者徒黨數萬人橫行贛鄂間以兇悍著爲害閭閻創深痛鉅官軍不能捕或且勾通之以助虐小民苦焉先生憤然曰大慙不除民何安枕立率其親信偏裨躬冒萬險深入虎穴卒將渠魁生獲正法並遣散其黨羽積年巨患一旦弭平贛民稱頌口碑滿於道路時滿清失德愈甚民怨沸騰有志之士奮起革命以救國先生首先加入奔走國事不遺餘力繼因念及桑梓乃歸浙日與杭辛齋同志密組國民黨以圖大事並預謀先握軍權進取較易時浙撫爲滿奴防範甚切僅畀以浙西營長乃聯合同志進行益力辛亥秋響應武漢先生謀定後行兵不血刃已白旂飄揚而全浙光復矣事成不居功退爲嘉湖統領因時代變遷盜賊叢起先生以剿匪安民引爲己責出其治轄之成規以治故鄉不二年浙西安謐七邑無驚頌德歌功萬家生佛前後任職至十六載之久民衆愛戴彌殷甲子秋江浙戰事會一度爲警備司令官駐軍浙邊屢摧強敵保全桑梓厥功尤偉先生文至道尹武至司令嘉禾文虎臺臺然惟兩袖清風廉潔自矢是其素志嗣因潮流變遷乃急流勇退隱居春申先生性慈祥救人危濟人急至糶米恤貧施衣解凍尤其小焉者也故海上有大慈善家之稱而親甚威嚴望之凜然若天人其部曲數千人無一攜貳者畏威懷德兼而有之也先生有子女各一子儀表非凡體魁梧而孔武有力肄業於光華大學且爲國術大家吳鑑泉師之高足女就學於裨文女校客歲寒假考試兄妹均占第一足徵先生家庭教育之有素先生慷慨任俠好交遊有朱家郭解之風以故海上聞人咸樂與爲交餘暇輒游於藝袍笏登場以福善禍淫爲旨糾正風俗不少近更新組杭州飯莊於愛多亞路嘗詔其夥友曰股東非營業牟利者此店爲若輩生計問題而設宜好自爲之始知先生之志在維持人類生活觀此益足顯其仁慈宅心若此福澤自無限量云

俞子章先生肖像



俞子章先生小傳

俞先生名珊字子章世居浙江鎮海縣之大契頭鎮鎮處鄉僻風氣窳塞先生生而英秀如一鶴立於羣雞之中時懷奮翮遠翔之志願以家貧資斧無所出挾一被一傘來海上同鄉諸老見之咸曰此子不凡遂從事於商以中國人不善儲蓄實爲致貧之由而泰西各國有人壽保險之經營爲誘掖社會儲蓄之一種其法最善乃孳孳從事於此各人壽公司爭相致聘會一度爲金星公司總經理先生喜交游而善詞令辭鋒所及四座咸欽莫不各饜其所欲以去以故座上之客長滿而所經營之人壽事業日益蓬勃而增上焉上海總商會當選爲執行委員前北京政府農商總長莫德惠企其材望聘爲諮議時以事就詢焉近歲以體弱多病築室養河於滬西之巨瀨達路有子三人其幼者尤雋異云



范回春先生小傳

范先生名錦春字回春浙江鎮海人家世業賈會洪楊之役始挈眷來申二世相傳因以爲家矣先生幼時卽負大志嘗以提倡實業挽回權利爲己任比長經營各業多所億中先生體貌魁梧夙喜提倡體育嘗觀於西人之賽馬者聲控縱送曲盡其妙不禁喜曰是亦體育之一端也又觀於吾華人士之購賽馬票者一擲千金了無吝色不禁又戚曰是雖細事以日計之固不足以歲計之則有餘涓涓不塞漏卮大矣會見滬北有地名引翔鄉者位置適中北連吳淞南接租界東依黃浦西毗江灣良地數萬畝惜以不事開拓致數十年來仍不能與四鄰並駕齊驅先生目光遠大具先見之明乃於引翔鄉拓地成立公共運動場招華人賽馬其間旣以鍛體育亦以杜漏卮也當進行之時屢經風波之震撼而先生終能以百折不撓之精神排萬難于不顧終能達到最後之目的此足見先生辦事毅力之一斑又建平屋數百幢名模範村取費極廉蓋完全爲一般中產階級而設其苦心孤詣多類此滬上自盧齊戰後瘡痍滿目地方官吏汲汲引去當道稔先生夙以造福鄉邦爲志乃昇上海縣事先生不屑爲五斗米折腰卽謝去近歲卜居滬西聖母院路平泉花木饒有雅趣長公子春生嘗留學扶桑屬筆爲文斐然可觀論者謂先生秉性抗爽而待人又極慈憫宗族交游有緩急相告者無不解衣推食相助積善之家必有餘慶天之報施固不爽也

徐新六先生肖像



徐新六先生小傳

徐先生名振飛字新六浙江杭縣人幼從耆宿受經史之學稍長考入上海南洋公學光緒三十三年卒業翌年由浙省派赴英國留學入柏明亨大學宣統三年得學士位復入孟德斯鳩大學商學院民國二年得商學士位旋又赴法求學以求深造三年返國次年任財政部僉事改任中國銀行金庫監事六年再任財政部秘書七年再入中國銀行任協理八年梁任公先生奉命赴歐考察政治遴選隨員號爲得人先生與焉抵歐值凡爾塞會議成立被任中國賠款委員是年七月歸國敘功授三等嘉禾章三等文虎章然先生感於政潮起伏不樂仕進遂來滬經營新通貿易公司滬上金融界耳先生名久往往倚重長才先生亦樂爲之擘劃近膺興業銀行總理之聘初梁任公先生每言欲整頓中國之財政必先改革中國之幣制顧無一人可與商兌者及得先生歎爲奇才所著幣法考一書采摭先生之議頗多圖法之壞至今日極矣能繼任公之志起而改革之者非先生莫屬先生又雅擅外交感於中國受國際上種種不平等等束縛輒持正論爲中外所欽服因此爲人望所歸本年被推爲上海納稅華人委員會華董云

徐慶雲先生肖像



徐慶雲先生小傳

徐先生名品偉字慶雲浙江慈谿人父錦章公設紗肆於滬性好施予交游稱長者先生幼敏慧就讀村塾九齡即通四子書塾師奇之無何錦章公捐館舍紗肆亦耗閉先生母馮太君泣謂先生曰汝父一生仁慈我知汝之必能有成然恐予之不及見也先生亦泣及年十六以貧故棄讀習買主者察先生勤慎傾心委任之積數年乃自設紗肆於滬上先人舊業賴以不墜然亦僅足自給而已某歲花紗停業有外商欲貸其所有久而不售先生曰人棄我取貨殖之道也乃以賤值得之已而紗市復振遂獲奇贏由是闖閩莫不服先生之有遠識焉先生嘗慨國貨之不興民生之日蹙至是乃斥資開設大豐慶記紗廠男女工人恃以爲活者達數千人旋任紗布交易所理事及大英銀行經理等職先生處境雖裕自奉殊儉惟宗族鄉黨有以孤苦告者無不稱情振恤不稍吝惜某歲浙省饑大吏籌賑甚急先生捐巨金倡之事乃集逾年東北各省告歉先生又以賑浙者賑之事平例得擬先生笑却之其急公好義而又不以沽名如此先生少孤長復遠游每以不獲親侍馮太君爲憾迨起家乃迎養於滬日致甘旨以博老人歡太君旋厭滬上煩囂先生復爲築室甬東以居之顏其廬曰詠陔及太君棄養先生哀毀盡禮每歲歸里必展謁邱壟猶若悽苦不自勝者蓋天性然也先生娶於陳勤惠能持家先生客游無內顧憂者陳夫人力也有丈夫子二長懋棠次懋昌孫一名字澄皆能世其業

徐冠南先生肖像



徐冠南先生小傳

徐先生名棠號冠南浙江桐鄉人少舉於鄉成甲午科舉人授內閣中書以纂脩會典書成加侍讀銜旋以郎中改歸戶部籤分山東清吏司行走任部時徵集同志提倡教育會勸辦會文學堂於都門管學大臣孫家鼐據以上聞傳旨嘉獎又以報効恭脩西苑輪車經費時慶邸掌奉宸院專摺奏保奉旨賞加二品銜以道員分發江蘇儘先補用並奉派駐滬辦理鐵路鑛務事宜復以辦理順直賑災異常出力全活甚多經北洋大臣袁世凱奏保勳勳卓著以繁缺道員儘先補用光緒三十一年歲乙未丁外艱回籍閉門讀禮謝絕人事服闋未幾即逢國體變更先生厭倦功名不再出山惟以繼承先志力行慈善為事故鄉烏青鎮有留學善堂始於道光十九年為先生之曾祖所手辦迄今五代將屆百年學堂經費向定獨家擔任不募外捐今仍恪守舊規繼續辦理先生家居多暇竭力從事整理冀維持於不敝又捐資附設私立敦本學校於學堂之內不收學費教育部獎給二等金質嘉祥章又以盡力辦理地方慈善公益民國五年黎前總統獎以勇於公義匾額授三等嘉禾章旋晉二等嘉禾章又以簡任職交國務院存記民十五丙寅先生花甲初周段執政欽其德望特頒週甲頤年匾額先生行善之餘時復兼營商業歷任上海總商會會董並各銀行各公司董事監察等職今年春秋六十有五而鬚眉清朗丰采如四十許人福壽正未有艾公子琦仲年十八勤學不輟繼鳳清整定堪繼美云

袁履登先生肖像



袁履登先生小傳

袁先生名禮敦字履登浙江鄞縣人也家本寒素幼年備嘗艱苦始克入一基督教會所設立之學校肄業在校勤奮過人由同鄉資助學費入聖約翰大學肄業學成回甬長斐迪學校教務凡八年其間兼任浙江第四中學及益智學校英文教員武漢起義四方響應盧波亦踵起設軍政府先生被任爲外交兼交通副長造福桑梓頗多建白中華民國二年應聘漢川鐵路督辦岑公之聘未幾辭職先生不以其所學自滿兼欲增進其商業智識遂入上海商務印書館襄辦總經理處事務民國六年曾兩次東渡日本遍游大坂名古屋東京西京神戶橫濱等處考察工業狀況回國後貢獻於社會者極多旋注意組織輪船公司及採辦煤礦等事因先生對於輪船事務研究有素頗多心得民國九年寧紹商輪有限公司董事會聘先生繼石君運乾之任爲總經理勤懇精細對於改革管理方法均爲同人所悅服先生除任寧紹公司事外如上海國民銀行恆安輪船公司遠東公共運動場振新冰鮮貿易公司均被選爲董事又任上海各路商界總聯合會會長並代表內地航業充上海扶輪會會員凡公益慈善事務尤具熱心曾歷任上海總商會會董中華全國基督教青年會協會委員上海青年會董事兼副會長華洋義賑會董事寧波旅滬同鄉會理事上海公共租界華人納稅會副理事長上海公共租界工部局華顧問先生生平辦理公益及服務勤奮倍於常人然從不肯受絲毫之錢海上各界仰先生如景星慶雲而先生謙退和藹有加爲人所不及云

唐少川先生肖像



唐少川先生小傳

唐先生名紹儀字少川廣東香山人生於遼清咸豐九年光緒初會國藩奏派學生留美先生與焉肄業哥倫比亞大學歸國後司朝鮮海關事袁世凱奉使朝鮮任爲文案十九年擢總領事東戰起始行歸國二十六年袁巡撫山東奏請隨行會義和團起先生助袁戡定魯難厥功甚偉二十八年任津海關道三十年奉旨使西藏且赴印度會議藏印交涉事卽於次年在北京訂約三十二年陞外交部右侍郎旋任督辦鐵路大臣未幾又任稅務督辦是年冬轉郵傳部左侍郎外簡盛京巡撫三十三年爲拳匪賠款事奉旨使美宣統二年陞郵傳部尙書三年辛亥革命軍起奉命爲南北議和代表赴滬與伍廷芳締結取銷清廷改建民國之約民國元年袁世凱被舉臨時大總統任爲國務總理是年夏辭職四年袁叛國稱帝建號洪憲先生憤而走南方五年袁敗黎繼被任爲內閣及外交總長均未赴任旋偕孫中山岑西林諸公率議員南下組織護法政府被選爲總裁旋與北廷代表王揖唐開和議於上海已而北方軍閥驅徐逐黎交關不已南方改建革命政府率師北伐先生遂謝去政治優遊滬港然每值國家政變之際蒼生霖雨之望未嘗不在東山絲竹也國民政府近授先生爲中山縣訓委會委員長將以樹之模範爲四方取法或有疑先生紆尊者先生正色解之曰官吏同爲國家公僕何論崇庫君等豈不聞華威頓總統解職之後曾爲縣知事耶其見解之高度量之雅如此

奚尊銜先生肖像



奚尊銜先生小傳

奚先生名光華尊銜其號也世居江陰南鄉之溇澹里昔有奚將軍諱成者其祖也始由淞江遷居於此有子三長出守貴州平越值苗亂父子戰歿次者赴難統兵平之襲職留守平越遂家焉其居江邑故里者則爲三房於是奚氏有黔吳兩支先生爲三房裔曾閱世十有八傳其間工文學翊武略暨服官守令者累葉有人鄉人稱望族焉先生尊人潤如封翁以商戰雄於滬其所手勅者卽今雄長商場之瑞康顏料號是也早卽世賴賢母馮太夫人內外措注業迥不墮先生兄弟稍長遂仍其業席先人之餘篤於用人商務蒸蒸日上門戶益光大矣先生幼歧嶷長好俠天性友愛臨難不搖一日與兄尊銘附小輪回籍省墓歸途出望亭橋右舷繩忽斷舟碎覆先生手挈其兄破腹出乃獲免又嘗乘雙馬車馳於路一馬蹶車立仆先生急自車中躍出適電車風馳過生死間不容髮然竟無恙屢類於危而卒邀天佑豈無故哉生平以經商爲職志除顏料外若銀行錢莊紗廠綢緞局之類並兼營心精力果任總商會會員于今八年性好善遇有稱貸或以公益事告者罔弗應如橋梁道路水旱疾疫醫院學校等輒輸巨金以倡歲除施衣米著爲例民國七年湖南水災先生捐巨款振之活人無算十年江蘇水災本省軍民長官以振務評議員相譖誣輸捐奔走勞瘁弗辭以是名聞首座先後獎給二等大綬嘉禾章國務院存記備任職甲子之際當道以私忿構兵江陰城鄉難民麀集先生率族滬同鄉辦紅十字分會水陸出隊救護並施賑獨力募捐鉅萬并負履輪賒償之責華洋義振會會長馮夢華先生爲著四十壽言亟嘉許之謂能行善於鄉也舉凡公益團體莫不推先生爲倡如江陰公所董事長江陰同鄉會會長蘇州同鄉會副會長蘇州商團六團部長任職有年而仔肩莫卸者衆心所屬也置宅靜安寺路題曰尊園饒有亭樹花木竹石魚鳥之勝往來賓客一時賢俊性尤好古鼎彝圖書陳列滿室中摩挲撫玩蓋翛然自得云

馬玉山先生肖像



馬玉山先生小傳

馬先生玉山以字行生於廣東省香山縣幼有俊才遇事悉心研究弱冠後經營商業以僻處國內見聞隘狹欲酬壯志必作遠圖爰毅然涉重洋至美屬斐列濱羣島即俗稱爲小呂宋者是也創立一製造糖果餅乾廠於其地幾經艱辛不爲沮經之營之結果乃蒸蒸日上辛亥武漢起義共和告成眷念祖國遂回廣州旋在香港集資二百萬擴充其製造糖果餅乾營業公司組成後在香港註冊開幕又專設兩廠一製糖漿一造玻璃復來滬設總公司於南京路並普設分公司於各省及南洋羣島之通都大邑其糖果餅乾暢銷國外民國九年集合同志創立中華製糖股份有限公司集資千萬購廠基於吳淞呈准政府免稅十年其明年遍遊全球精究製糖事業英美德法日荷嚨瑞士等處靡不有其足跡回華後以股東意見齟齬遂至停滯而所營之糖果事業亦連帶失敗以先生之卓識長才而致此顛躓蓋有命運存焉非戰之罪也

馬承康先生肖像



馬承康先生小傳

馬先生名驥良字承康以字行鄭人而生於滬十一歲而孤家四壁立母甘太夫人撫以成人讀書於澄衷學堂淬勵攻苦同學者皆爲動容少長以家寒輟讀習商於瑞生洋行寄父尤公葛民之門克勤克慎尤公激愛之無何瑞生收業人咸勸先生別就先生以尤公相待厚不忍捨去旋隨尤公入瑞記迨歐戰發生瑞記以德商故改組爲英商更今名安利先生習行事既有年經驗日富遂任爲漢口安利洋行機械部華經理於今十有餘年成績斐然中外信仰更以精力之餘與人合資組織鄭州豫中打包廠陝州打包廠漢口冰廠雖投資不如他人之巨而設計皆出先生手蓋他人遜其精審也以上各廠以及漢口第一紗廠均聘爲董事先生性忼爽以金錢爲身外物視之不甚重凡求者無不應待以舉火者若干家故事業雖隆而至今無餘資又喜爲公益事馬氏舊名存德堂設存德學校於故鄉以培植子弟今年獨斥巨金以修譜先生居常持論曰人有德於我不可忘我有德於人不可不忘故其念舊酬恩加人一等今夏尤公葛民病逝先生千里來奔喪哭之慟又性方嚴經營機械事業者例與達官巨商相往還挾妓徵逐無虛夕先生獨塊然與衆殊不履花叢不飲花酒相習既久衆亦稔知其性情不特諒之且轉因而重之有丈夫子一名芳粹年十六已英英挺秀人謂馬氏有子矣

孫慕韓先生肖像



孫慕韓先生小傳

孫先生名寶琦字慕韓浙江杭縣人文靖公之子也蔭主事分刑部幼讀書有遠見中日之役都人士多主戰公獨持異議謂宜允朝鮮自主不宜與日人開釁乎壤敗後乃上書政府請速議和保全北洋門戶兼留海軍根基時論大譁幾遭不測旋以道員由直隸總督王文韶奏調北洋差委勸育才館及開平武備學堂宏造人才光緒二十四年保薦使才奉旨召見記名是年冬隨李鴻章赴山東查勘黃河海口二十六年赴西安行在辦理軍機處官電會勸設政務處辦理新政越二年出使法蘭西抵法後聯絡邦交考察政治屢上封奏以定憲法行新政爲請保薦使才如李經方陸徵祥劉式訓等皆先後出使近時外交家如顧維鈞唐在復陳籙王繼曾等非其僚屬卽其門下任滿回國授順天府尹次年復出使德國又次年特簡幫辦津浦鐵路大臣及回國後拜山東巡撫之命年甫四十而領封疆丰采凜然萬人爭仰而勤政愛民不畏強禦不尙聲華與德人商定取銷曹州條約內沿鐵路三十里內鑛權及五處鑛權拾宣統三年民軍首義知清運之已終一面奏請宣布共和保全皇室一面引病退職民二任外交總長與俄國互換文件使承認外蒙爲中國領土民三兼代國務總理旋調任審計院長民五調任財政總長適政府勦鈔票停兌之議堅持不可憤而辭職旋任稅務處督辦民十二任國務總理手定中俄和約爲取銷不平等條約之先聲公任稅務督辦最久平日以恤商爲主不以培克聚斂爲能故服官三十年宦囊如洗然對於慈善事業則絕無所吝恆稱貸以與之昔年北五省旱災時先生正督辦稅務建議在海關附加稅一成集款千萬救活災民無算他如爲政不樹黨援用人一秉大公無黨無偏中外仰之美丰儀長聳過腹誠一時之人傑云

孫梅堂先生肖像



孫梅堂先生小傳

孫先生名鵬字梅堂以字行浙江鄞縣北渡人也生於遜清光緒十年幼聰穎年十四入上海聖約翰大學爲高材生十八就買於漢皋二十承父業初君父廷源先生設美華利鐘表號于上海勸建時鐘工廠倣西法製造時鐘實爲中國經營鐘表業之嚆矢君掌肆事力圖擴充至今分號已臻二十餘所工廠出品極良歷預巴拿馬小呂宋及國內賽會俱獲優獎君性溫厚待人一出至誠平居無疾言厲色於社會事業設施尤多痛鴉片流毒之深曾於光緒三十四年收買大宗烟具燬之於滬之張園改滬上大烟肆爲商品陳列所耗巨資無吝色又在甬江本鄉獨資創設農事試驗場以改良農事爲職志設啓賢小學校以培植鄉里子弟保送學生入各大學並資助歐美留學者先後凡數十人滬甬交通一葦可渡甬人來滬業工商者與歲俱增君集同志組織寧波旅滬同鄉會建築會所設立學校敦鄉誼以造就同鄉子弟倡議設計君實與有力焉上海寧紹商輪公司之設甬人所以自謀交通便利計也當公司初成航行方始同業即貶價來競君恐偉大事業敗于垂成乃發起航業維持會以維護之該公司今日得巍然獨立營業蒸蒸日上者非航業維持之功曷克臻此鄉人感君惠推任郵奉公益醫院院長及上海四明公所四明醫院寧波旅滬同鄉會寧紹商輪公司董事並歷任上海總商會會董政府以君功在社會由大總統頒給敬教勸學及拯溺爲懷匾額以褒榮之云

孫景西先生肖像



孫景西先生小傳

孫先生名元方字景西安徽壽州之世族也天資聰穎年十九留美求學二十八得哲學學士學位回國入北京中國銀行辦事時中國銀行正擬草定銀行營業規則及發行紙幣其規劃多爲先生所手定未幾任中國銀行監察員兼財政幣制委員會董事民國三年調任漢口中國銀行副行長任事二年辭赴滬應阜豐麵粉廠總經理之聘民國五年孫多森先生創辦中孚銀行兼任中孚銀行滬行總理綜計先生敷衍於商界數十年以致力於金融麵粉兩業爲最多曾充麵粉公會董事上海銀行公會副會長總商會編輯股委員中孚銀行董事阜豐麵粉廠董事長河南同豐麵粉廠總理山東濟豐麵粉廠董事無錫豐泰麵粉廠董事上海利興轉運公司滬豐堆棧公司董事及北京通惠實業公司董事均能勝任愉快云

孫松年先生肖像



孫松年先生小傳

孫先生松年別號鶴齡湖北江夏縣人也先世以耕讀世其家其尊人清若公質直好義至今鄉里間猶稱道之先生幼讀絕慧旋即棄書習商以絲業爲民生日用之大宗遂專心壹志於絲光緒中葉李文忠勳辦華威紡織紗布廠於上海楊樹浦招先生與某西人共同經理之先生悉心研究盡得西人之秘未幾遂辭退西人獨任經理者六年嗣張文襄創辦湖北紗布紡織廠先生奉召回鄂襄理廠務者四年浙商陳伯溫勳設惠通公紗廠延先生爲經理者四年皖商朱幼鴻勳設裕源通紗廠延先生爲經理者亦五年後遂自設恆記號於海上專營綿紗事業以先生在棉業界之資望及經驗故雖當絲業疲滯之年人皆憂我獨有餘民四鄂商李紫雲勳辦湖北漢口第一紗廠及漢口打包公司先生均參加發起民九發起上海棉業交易所及棉業銀行被選爲理事董事並歷充漢幫棉業公會主席工商部棉業顧問先生生平所作公益慈善事業如發起重脩上海湖北會館及丙舍湖北旅滬同鄉會推爲事務主任勳脩鄂省和尚橋並入湘驛路歷充漢口慈善會董上海濟生會及婦孺救濟會董事乙丑年全鄂水旱災丙寅年武昌城災勸募委員會經李文忠張文襄先後題贈民生在勤功在民生匾額黎大總統頒給大善士匾額湖北省政府頒給樂善好施匾額云

倪文卿先生肖像



倪文卿先生小傳

倪先生名淦字文卿江蘇丹徒人丹徒倪氏爲望族賢遷海上者屈指盈數十人而先生實爲巨擘先生初經理永和行及總理清記公司嗣兼元成運輸公司總經理其間復被舉爲上海運輸公會會長京江公所同鄉會董事轉運公所上海總商會等委員皆以老成練達爲人推服先生生平最敦友誼余老友金君琴孫亦先生摯友也嘗設祥裕公運輸公司廣交游聲名洋溢海上不幸爲人狙擊以死身後蕭然一家十餘口將無以爲生先生慨然曰琴孫雖亡我不忍其妻若兒之凍餒也乃爲經紀祥裕公業務夙興夜寐殫精竭慮數十年來營業日盛琴孫一家至今能賴以溫飽者微先生之力不至此也晚近人心澆薄往往生前笑語真若可信而一旦死去便不復顧聞先生之風其亦可以稍愧矣先生晚年頗耽禪悅皈依印光大法師長齋念佛篤修淨業竊謂古來成佛者類屬至性過人之輩觀先生之於琴孫一生一死乃見交情其至性洵有大過人者他日靈山法會有現壽者相手摩尼珠高宣佛號而來者非我文卿居士而

誰

張嘯林先生肖像



張嘯林先生小傳

張先生名寅字嘯林浙江慈谿人性任俠好交游慕朱家郭解之為人嘗肄業武備學校歷年餘卽棄而至滬設一旅館蓋欲置廣廈以招致天下士使之歡顏不斤斤於營利也旋識黃先生錦鏞杜先生月笙彼此傾慕相見恨晚步趨聯袂訂爲莫逆爲滬人所共慕民國十六年革命軍奠定東南而共產黨乘機作亂先生聞之憤甚乃與黃杜二先生率人攻之血戰一夕殲除殆盡滬人轉危爲安萬口交頌政府聞而義之欲畀先生以顯職先生笑曰昔魯仲連解邯鄲之圍平原君壽以千金而不肯受今日之事亦猶是耳中外聞者更嘖嘖稱美先生暇日好作山水游杭州之西湖其童子時游釣地也近歲祠宇毀敗風景零落先生乃偕黃杜二先生發起慨斥巨資次第修葺已落成者有天竺之大殿靈隱之彌勒殿東天目山之大殿寧波奉化雪竇寺之大殿紹興嵯嶺縣東鄉北莊鎮蔡家橋紫雲洞之大路一條普陀山之天王殿蘇州閶門之壇齋庵西鄉之猛將廟湖州白雀寺之二殿塔院天竺之關帝廟茅家埠之關帝廟清泰門之關帝廟西泠武松墓等其餘尚有獨資建造者涼亭計有五處名曰林海亭一在小康湖二在五雲山上三在東天目山四在玉皇山麓五在小和山下水口又昭明寺至東天目山之路五雲山至雲栖之大路均已修成平坦石鶴嶺通錢江之路其間築橋七層至廟宇則普陀山前寺普庵阿彌陀佛殿杭州平海路蘆王廟皆出自先生一人輸資創造遼清光緒二十二年起並組織竹安集香會施材施茶迄今三十餘年如一日又於慈谿支浦地方獨資創辦張氏小學造就人材不少其急公好義退邇咸稱現任上海法公董局華董及納稅華人會主席先生年逾五旬而精神猶矍鑠云

張慰如先生肖像



張慰如先生小傳

張先生名文煥字慰如浙江嘉興人束髮受書嘗讀魯論至賜不受命而貨殖焉億則屨中不禁掩卷若有所慕少長游海上時中外交通商戰劇烈愛國志士競言提倡國貨以挽回利權先生獨謂提倡國貨必自流通資本始欲流通資本以振興實業則證券交易所尙焉先是日人設取引所於滬上已歷有年所號爲平準市價實則操縱金融先生蹶然起曰是我國人之責也乃與海上商界諸聞人組設華商證券交易所而先生任理事長先生平日盡力於海上各界者其事甚多不可備指數而聲望旣隆金融界傾心誓折咸思藉重中國銀行會舉爲監察國民革命軍底定東南以後以整理財政之故特組經濟會議委員會聘爲委員先生獻可替否頗多建議云

張澹如先生肖像



張澹如先生小傳

張先生名鑑字澹如浙江吳興縣南潯鎮人也少穎異絕倫富於治事才
遇疑難事立斷不移晷在遜清之季年潯鎮以殷富著而俗習囿於固陋
尠具世界眼光者惟先生與伯兄弁羣公創立學校開風氣先遐邇因以
成材者甚衆先生家故巨室商業幾遍國內尊人定甫公喜君幼慧好任
事故先生年方弱冠定甫公卽日夕怡情詩畫壹意慈善事業所營商業
一以委諸先生先生受事措置裕如起衰振敝規畫悉當同事咸折服自
後日益光大經營實業至夥皆成效彰著海內外莫不知先生爲當今一
大企業家矣先生雖習處豪華而自奉樸約家無姬侍惟日以勵學勸子
弟長子藕舫女緯文先後畢業於美國大學擅專長皆敏而好學不知有
紈袴習氣一門之內雍雍穆穆如也先生善交游海內賢豪長者多與聯
懽而篤於情愛才無小大獎掖唯恐不至知人善任襟量闊廓故舊有急
視若己事周助之若不及其風誼如此蓋天性然也企業餘閒尤雅好弈
而技彌精國中及日本之善弈者道出海上莫不延致聚弈其門隱然爲
弈家壇坫先生雖在劇忙之際日或與客對弈一二局顧先生應事斡暇
晷平居不汲汲讀譜對局時運思下子應手自得其妙巧竟與國手相頡
頏弈者咸驚爲天縱才云

張公權先生肖像



張公權先生小傳

張先生名嘉璈字公權江蘇寶山縣人十三歲時肄業於江南製造局附設之外國語學校受教於前駐瑞士國公使陸徵祥先生肄業三年轉赴北京國學館年半畢業派送日本留學以求深造抵日後投入慶應大學習經濟畢業回國任郵傳部部員政體鼎革來滬參預政治民元應浙江都督朱瑞之聘任軍政府秘書民二二次革命未發生前政府召集國會任國會秘書長迨前大總統袁世凱解散國會後先生始入中國銀行辦事任中國銀行上海分行副經理民四三次革命反對袁氏帝制政府頒布停止兌現令先生獨毅然以爲非是屢經抗議無效遂於上海分行單獨兌現商民莫不稱頌其明決果斷有如此者民六秋梁啓超氏任財政部長任先生爲中國銀行副總裁民八該行召集股東會復被選爲該行副總裁民十一夏繼續當選以至於今綜計平生任職中國銀行最久維持擘畫之功亦最鉅先生雖擅長於經濟顧仍不失爲學者深通英日法等國語言文字爲文學界所推重云

張景文先生肖像



張景文先生小傳

張先生名福運字景文籍隸山東幼居烟台肄業
中學旋考入北京清華畢業後遣送赴美入哈佛
大學於民國三年得學士位復入該大學法科習
法律民六復得法學士學位同時爲哈佛大學文
學會會員民六民七之交被選爲中國留美學生
會會長民七回國入外交部供職兼任國立北京
大學教授萬國公法民八民九兩年任駐俄大
使館祕書民十民十一兩年任華盛頓會議中國
代表團祕書是年冬回國任交通部航政司參事
草擬中國航政條例民十二以後任交通大學校
長國民政府成立勵行關稅自主關務署長一席
頗難得相當之人選以先生學識優卓操守清嚴
遂拜關務署長之命云



許雋人先生小傳

許先生名世英字雋人安徽人前清光緒二十二年廷試拔貢授刑部主事任法律編纂員宣統元年任奉天高等審判廳長旋擢江西提法使二年隨徐謙氏赴歐洲考察司法制度並赴美國列席監獄改良會議中華民國元年張金波上將任直隸都督聘先生掌典籤同年五月被命爲大理院院長旋改任司法總長三年辭職十月被命爲奉天巡按使明年調任福建巡按使六年辭職旋被命爲內務總長七月轉交通總長次年辭職八年十二月授二等大綬寶光嘉禾章十年授勳四位十一年被命爲安徽省長兼賑務督辦十二年晉一等大綬寶光嘉禾章十一月被命爲司法總長辭不就明年被命爲航空署督辦亦不就嗣是奔走南北調和政見冀化干戈爲玉帛登斯民於衽席迨十二年冬張作霖馮玉祥推倒直系曹錕去位段芝泉上將入京就總執政職被命爲秘書長然先生鑑於各方軍閥割據地盤唐代藩鎮之禍將復演於今日遂毅然掛冠去往來津滬間好與韋布之士往還文酒唱和殆無虛夕然先生胞與之懷固未嘗一日忘也比歲陝豫等省大饑先生首倡振濟登高一呼巨資立集數百萬饑民之得苟延殘喘者皆拜先生之賜也國民政府初擬昇先生以要職先生不樂乃以賑務督辦委之亦從先生所志也


許秋颿先生肖像



許秋颿先生小傳

許先生名沅字秋颿江蘇丹徒人幼年肄業於上海中法學校及彙英書院復考入南洋同文館轉入金陵大學畢業後佐南通張謇創辦西學堂於南京文正書院清戊戌政變一切新政悉皆罷斥先生獨設方言學社於杭州浙撫緝緝梁偉其才委辦交涉事務應付悉中窳要山西承庚子拳匪亂後民教衝突積案疊疊巡撫寶棻奏調先生赴山西襄辦交涉先生銳意清釐民教齟齬服時朝廷方頒分年禁種鴉粟之令山西種煙最廣先生力主剋期嚴禁商諸布政使丁寶銓積極進行並先勸令各主教約束教民毋得違抗歷一年遂報肅清欽勞擢知府寶棻移撫江蘇先生爲黨幕職嗣赴河南充交涉局坐辦兼任撫署參議辛亥武昌事起河南黨人謀響應巡防軍官將加捕戮先生苦心斡旋其間共和成立市肆不驚人多頌之民國元年任河南交涉局長二年改河南交涉使英商福公司礦業糾葛巨二十年久懸不決先生奉派赴京會議成約而還一時中外咸服其能整頓雞公山避暑區域工程警察力予改良外人稱頌又與聖公會會長懷履光創辦公共衛生會設講演團灌輸常識迄今分會徧於全省民國八年江蘇交涉使員缺政府念先生資勞最深特命量移上海爲華洋縮蠶之區交涉案件紛至沓來先生對外能持大體中外人士咸仰賴之奉命代行俄領事職權兼任上海俄僑通商事務局總辦十三年齊盧釁起烽火瀾漫遍於滬郊先生撫綏中外咸得機宜以故戰事遷延數月而滬上租界七邑不驚外人亦迄無責言先生力也累功晉一等大綬嘉禾章二等大綬寶光嘉禾章三等文虎章以全權公使記名然先生不喜急功近名富貴利祿視之蔑如也自解組後僑寓海上布衣蔬食若將終老然海上每有交涉折衝境圉人猶想望其丰采焉

陳鎮東先生肖像



陳鎮東先生小傳

陳先生名世光字鎮東籍隸廣東幼讀書工英文尤擅長於英語並熟諳外人之交際光緒二十七年上海道袁海觀契其才招邀入幕充任繙譯兼任英文文案歷有年所譽滿中外辛亥武漢起義其時上海道劉燕翼將海關及道庫委託上海領團暫行保管並檄委先生襄助焉翌年領事團將保管財產交還中華民國政府由是君遂被委為江蘇交涉公署交際科科長先生於外交本為熟手應付裕如成績懋著奉令交國務院以簡任職存記民十三政府因先生供職外交界二十餘年勤慎耐勞辦事敏捷特簡為江海關監督兼外交部特派江蘇交涉員接任伊始正值滬上多事之秋不辭勞怨克盡厥職時有多數軍人蟬集中法華租交界之處距同文書院甚近外人聞之懼其妨礙治安當由法日兩領事特請先生向軍人長官面商將軍隊撤退先生舌敝唇焦始得商妥返署時突被軍人包圍執槍恐嚇君處此凶橫危險之際雍容沉靜即將所任職務從容告之始得化險為夷中外交口稱譽先生才膽不置國民政府成立被任為外交部駐滬辦公處處長先生駁歷外交界幾三十年矣聲華之盛甲於一時江浙當局均聘為外交顧問政府疊次頒發文虎嘉禾等章友邦如法日德瑞典葡萄牙安南等國均贈與優等寶星實為當今外交界特出之人材而賦性謙退待人誠懇處事忠勤故中外人士咸樂與周旋云

陳介卿先生肖像



陳介卿先生小傳

陳先生名其壽字介卿浙江海寧人海寧陳氏爲累葉世家冠蓋文章傾動海內先生生而奇慧幼擷芹香文字之外擅場書畫遨遊都下名動公卿供職京曹屢躋清要旋以情殷菽水改官南旋大吏傾其丰采爭相刮目歷任吳縣江陰金山等處知縣琴堂花落循譽四馳並歷充工務商務學務農務外交警察軍械電務各差莫不勝任愉快南洋勸業會開幕任農工商局局長閉幕後發起江蘇工業自治會先生被任董事旋轉任發審局累年不結之要案先生目閱手判如掃落葉無一舛訛以功保升道員民四朱家寶巡按直隸檄調先生知縣事民六屈映光巡按浙江復調先生贊襄政務民八蘇省當局以先生精於識事選充上海法租界會審官奉職以來瞬逾十稔治獄平允衆口交稱先生日常臨識一以慈祥爲主故小民受惠感恩者衆更於治獄慈祥之外復熱心於災賑見義勇爲行之不懈其陰德之厚實爲福壽之徵云

陳雪佳先生肖像



陳雪佳先生小傳

陳先生名兆瑞字雪佳廣東中山縣人生於清光緒十三年幼而岐嶷肄業於香港大學學問冠其儕畢業後即來滬佐其尊人可良公經營商業具有幹才可良公任太古洋行華經理爲粵商旅滬者之領袖余嘗從公遊態度和藹令人可親可良公歸道山先生繼其業其爲人也伉爽不欺以是人望歸之中外友人凡與先生締交者無不佩其高誼廣肇公所仁濟醫院聯華銀行等均先後聘爲董事又任上海總商會會員交通部顧問先生見義勇爲遇慈善事傾囊恐後華洋義賑會推爲募捐董事當軸聞而嘉之民國十一年曾授三等嘉禾章云

陳蔗青先生肖像



陳蔗青先生小傳

陳先生名介字蔗青湖南湘鄉人湘鄉爲會文正公故鄉閭里子弟無不悅學先生少年卽以能文稱已而清廷廢科舉興學校考派學生赴日留學先生與焉卒業東京帝國大學轉入德國柏林大學攻法法經濟復漫遊歐洲考察政俗辛亥革命政體更新先生歸國任工商部主事旋擢農商部工商司司長任職五年曹務秩然調任國務院參議時對德宣戰事起主戰主和議論不一先生建言政府策德必敗議遂定其後接收天津漢口德租界皆與有力焉民國六年任農商部秘書兼財政部參事未幾簡任山東實業廳長先生辭不就再調任國務院軍機討論處處員七年被選湖南國會議員八年授二等寶光嘉禾章九年授二等文虎章卽於是年被任江漢關監督次年兼任外交部特派湖北交涉員先生內則綜覈權酷外則折衝尊俎政事叢脞無不立辦頗爲漢上人士所稱服十二年以記名公使及大使存記十三年辭職赴京任全國水利局副總裁先生天資穎特精通英德法日及拉丁語文在京時兼任北京大學及北京法政專門學校教習妙語解頤有匡鼎說詩之風近年淡於任宦從事於銀行事業云

陳霆銳先生肖像



陳霆銳先生小傳

陳先生霆銳江蘇吳縣人其尊人爲著名學者以是先生得能傳薪焉清光緒三十一年投入蘇州東吳大學肄業苦行勵學力攻英文研讀二年乃來滬復致力於外國文學會於中華書局任編輯者數載無何梁啓超先生創辦大中華雜誌風行一時先生擔任副主筆一時有瑜亮之稱先生擅長中西文字出其所學譯成書籍多種每屆出版動輒紙貴洛陽民六先生以傾心法學更入東吳大學法學院刻苦研究三年遂得窺歐美法學門徑民九卒業得法學士位翌年夏自費赴美入密歇根大學深造民十得法學碩士位翌年復得政治學士位以法律學識負有盛名於是密歇根母校聘爲教授並致送榮譽獎金洋五百元爲當時留學界之異數以是被選爲該校中國留美同學會會長華盛頓會議開幕應上海新聞報聘任特約通訊員中國新聞記者得列席於會議中記錄實以先生爲嚆矢民十一歸國卽應東吳大學之聘任國際公法講師自是先生於研究法學之外復被申報聘爲特約編輯員先生平時於中國各報發表近代各問題均爲一時所傳誦民十三收回上海會審公廨問題發生被選爲赴京會議四代表之一近被選爲上海租界納稅華人會委員並執行律師事務於海上爲法律界之泰斗云

莫子經先生肖像



莫子經先生小傳

莫先生名錫綸字子經江蘇上海人前清恩貢生上海自開埠以後租界市政蒸蒸日上而我華界猶付闕如不僅居民感覺不便抑亦中外觀瞻之所係焉先生乃與李平書姚子讓諸君提倡地方自治成立總工程局旋改城自治公所均以先生任坐辦董事於是敷路填河折城諸工程次第舉行滬南市政始有可觀蓋皆先生與李姚諸君力也光復後又改上海市政廳而先生復爲市長民國二年縣議會成立被選爲議長已而總統袁世凱陰圖稱帝取銷自治改任南市工巡捐局局長袁氏既死共和復活先生與副議長李佑之君聯合江蘇各縣議會請願恢復地方自治當局難之先生等據理力爭卒底於成各省聞之亦援例以請地方自治完全恢復蓋微先生及李君之力不至此也先生近年目擊軍閥之橫行絕口不談自治之說然地方官紳每有籌劃猶往往請益於先生焉先生現任南市電汽公司駐董及各慈善團董事今年已七十有四而精神矍鑠不減壯年膝下僅一女名潤珠字念初知書工繪事以終鮮兄弟誓效北宮養親故事不幸今秋以病歿云

盛澤承先生肖像



盛澤承先生小傳

盛恩頤先生字澤承遜清郵傳部尙書杏蓀宮保之四公子也
生而聰秀年稍長卽入北京郵傳部高等實業學堂肄業各科
成績均優爲同學中之秀出者旋赴英吉利入倫敦大學未幾
復留學美國入哥倫比亞大學數年而歸宣統二年又東渡日
本考察實業狀況先生深念盛氏在中國實業界所經營事業
甚多故決意經營商業漢冶萍煤鐵鑛廠公司股東會選君任
董事兼經理同時三新紗廠亦選君任董事會會長中國通商
銀行盛氏佔鉅股亦推君任董事去年豐盛實業公司成立君
被選爲董事會會長兼總經理頻年各省災荒先生迭捐巨款
拯救災黎無算是不獨爲實業家亦慈善家也政府爲勸善酬
庸曾授以勳五位一等寶光嘉禾章並佩日本帝國二等旭日
章惟其力之厚故爲善亦宏邇來家業稍落而先生態度安定
不改故常其胸襟誠足多已

黃錦鏞先生肖像



黃錦鏞先生小傳

黃先生名金榮字錦鏞江蘇上海人也。粵人炳泉公江蘇提標候補守備性豪俠而慈祥生平行仁積善明德之後固宜有達人焉。先生生而魁梧幼以孝行聞於鄉里。初習牋扇書畫業有相者奇之曰此人中鸞鳳非杖棘所能樓也。平日慷慨仗義凡遇不平事輒喜作魯仲連弱冠棄商入上海法租界捕房服務捕盜緝匪屢著能聲。旋有太湖劇盜搶劫巨案先生奉命赴蘇辦理躬自往捕盜首黨悍難擒先生不避艱險與之搏盜登屋先生亦登屋躍下時傷其足盜泗水先生亦泗水幾滅頂盜卒被手擒而先生足傷甚劇至今風雨陰寒猶時時作痛也。法當局欽其神勇大加刮目嗣後凡遇巨案他人所不能破者先生必破之以是洊升督察法界治安賴若長城焉。辛亥革命先生保護人民維持地方晝夜不息海上得雞犬不驚先生之功有足多者。南北各軍爭相羅致聘為諮議顧問等職黎大總統特授陸軍步兵上校任為侍從武官甲子冬先生以舊時足傷天陰輒發決意辭退督察職務法當局一再堅留先生不得已勉允退職後仍遇事維持丙寅春法當局以先生老成練達強令再起聘為高等顧問遇大事必諮詢而後行明年夏國民革命軍蒞滬共黨猖獗有謀侵入租界之舉先生乃集合同志不動聲色一夕而肅清之地方賴以安甯國民政府嘉其功擬酬以要職堅不肯受乃授為少將參議焉。先生有功於法租界最巨遠聞於法政府法國東亞全權大臣安南總督特保獎給頭等二等金銀質寶星前後凡三次一在西曆一九二一年（即民國十年）一在西曆一九二四年（即民國十三年）一在西曆一九二八年（即民國十七年）亦國際間之異數也。先生性最孝於漕河涇購地建立黃氏宗祠以誌慎終追遠之思又樂善不倦救災恤貧之事日有所聞其尤著者獨資創辦金榮義務學校以嘉惠貧寒子弟頻年以來畢業者已達千餘人云。



黃礎玖先生小傳

黃先生浙之餘姚人初名承乾字楚九後以字行因更號礎玖焉爲明末大儒黎洲先生之裔尊甫知異老人邃於醫眼科得異人傳授尤稱神手先生幼世其業遍覽醫籍以中醫缺腦臟義欠圓滿遂決然捨去專心研究西藥創設中法藥房嗣復兼營中西藥房又創設九福公司綜計先生生平經營西藥事業發行有益良藥不下數十種莫不著手成春福世惠民厥功不淺此外創辦事業如大世界日夜銀行福昌煙公司九星煙公司皆蔚然大觀其他小者更僕難數顧先生性豪俠仗義疎財視金錢不甚惜故雖事業如雲而仍未臻豐亨之境先生凡事喜自出心裁恥襲人後腦筋靈敏加人一等又氣魄雄厚識力堅定處危疑震撼之交怡然不爲動非他人所及也恬退不樂仕進當道每虛衷邀致均辭不就惟上海總商會執行委員新藥業公會主席西湖博覽會委員紅十字會經濟委員等或於營業有關或於公益慈善有關者始勉就之樂善不倦見義勇爲凡慈善事業赴之恐後民八河南大災易子而食先生派人攜資前往收養嬰孩千餘人民十五夏上海大疫死人枕藉舊有時疫醫院診治不及先生毅然發起急救時疫醫院凡十日而成活人甚衆現已在北西藏路七浦路口自建院屋規模闊大設備周密又獨力創建眼科醫院於龍門路施診施藥經費一人獨任不募外款分文先生善量之宏可爲世法矣

黃涵之先生肖像



黃涵之先生小傳

黃先生名慶瀾字涵之江蘇上海人光緒二十二年入泮二十三年考入南洋公學師範院二十七年入仕以同知分湖北二十八年保升知府在鄂歷充學堂識局鑛務農林巡警司法鐵路各要差嗣奉派赴日本考察政教工藝著有東游日記回國後歷署德安府宜昌府知府簡放湖北高等檢察廳檢察長旋返滬充上海總工程局議董民元任上海地方審判廳廳長民三保以道尹交政事堂存記嗣奉令發往浙江任用民七署甌海道道尹旋兼任甌海關監督暨温州交涉員調任金華道道尹未赴仍留甌海任著有甌海觀政錄民九調會稽道道尹民十三卸職回江蘇民十四任江蘇善後委員會秘書長民十六國民政府任爲上海特別市公益局局長未幾辭職先生數歷數省歷任要職而恂恂仍不失儒者風仰承先志嗜善若命凡慈善事業無役不與歷任上海孤兒院上海殘疾院淞滬救養院普益習藝所游民習藝所上海救火聯合會樓流公所婦孺救濟會仁濟醫院上海醫院普善醫院仁濟堂保安堂新普育堂松江貧兒院南京佛教慈幼院寧波佛教孤兒院各處董事國民政府賑務委員會委員豫陝甘振災委員會駐滬辦事處副主任營業察賑振災委員會駐滬辦事處副主任浙江駐滬水災籌賑委員會主席上海慈善團體聯合會副委員長中國紅十字會常務委員兼常務委員經濟委員會中國濟生會副會長等職此外學校醫院及慈善團體藉先生之名以爲重者尙繁有徒不及備載先生又皈依佛乘大宏法門被推爲中國佛教會執行委員江蘇佛教聯合會暨江浙佛教聯合會常務委員上海特別市佛教會執行委員佛教淨業社社長世界佛教居士林理事等職先生於佛教專修淨土多所闡明曾手著初機淨業指南彌陀經心經白話註解勸世白話文戒殺放生白話文等書行世有益初機不謬云

黃幼蟾先生肖像



黃幼蟾先生小傳

黃先生名鉞字幼蟾別號穆滿湖南寧鄉人父萬鵬以軍功封男爵併襲晉伯爵先生襲爵以道員發湖北是時清政不綱先生知非革命不足以圖存上書鄂督張之洞說以日本維新故事張不聽庚子聯軍入京那拉后挾帝西遁先生在燕收集散卒圖刦取之以誤道不克遂流寓江寧與黨人相往還吳敬恆鈕永建之歸國當道欲捕之先生說而免鄒容炳麟之下獄黃與郭人漳張繼之被逮先生復挽英人麥士尼爲能君爲之營救已而返湘鼓吹革命黨人漸衆先生念東南民氣已極發皇所錮塞者獨西北耳會甘督長庚奏調先生入甘先生遂毅然就道與甘中志士周昆黎兆枚等從事運動辛亥八月武漢首義九月陝省響應先生時任軍事參議官說長庚中立長欲聽之而升允至督馬安良張行志陸洪濤諸軍三路窺陝陷長邠破隴城攻鳳翔轉攻醴泉勢張甚長庚亦以秦州爲甘南門戶檄先生募一旅守之先生遂駐兵天水撫綏回部聯絡友軍爲反正計壬子正月二十三日宣告獨立衆推先生爲正都督湘人向榮副之布告吏民萬衆歡躍久之趨惟熙始在省城反正忌先生功欲襲取之先生不爲動趙電總統袁世凱表功袁弗察令之督甘先生遂取消軍府解甲南歸已而宋案發生寧贛獨立袁欲令先生調停其間先生兩度移書段芝貴責之袁不能堪嗾湘督湯壽銘發緹騎大索先生微服遁石首旋赴天津組討袁團是時陸建章督陝袁之驍將也先生令衡陽陳貞瑞說胡景翼逐陸陸去而袁遂無能爲矣迨湘桂軍起先生入鄂促石星川王安瀾黎天才等獨立并遣書譚浩明程潛痛陳頓兵之非計譚程不能用而北軍張敬堯吳佩孚遂得入湘自是先生往來津滬間說耳渠帥促成革命然往往弗能聽甲子倒曹馮胡聯合先生之力爲多丙寅秋國民軍由粵入湘長驅武漢先生招集舊部敗吳佩孚於黃陂且分兵入武昌爲內應又令所部任笑山一軍助鈕永建王天培攻佔徐州東南底定先生蓋與有殊勳焉現充國民政府行政院顧問先生不第曉暢軍事且深諳文學其致段芝貴黎元洪吳佩孚諸書詞義爾雅爲時傳誦所著有怡齋詩文集雲濤閣詞存隴石光復記革命回憶錄楚春樓隨筆又輯刊唐詩鏡儲英館叢書華宵幻影帕米爾圖說等生平著作等身誠不愧文武兼資者矣

黃弈住先生肖像



黃弈住先生小傳

黃先生弈住福建南安縣之樓霞鄉人年二十一渡荷屬爪哇在三寶壟營五年始開其最初之商店卽今之龔日興總行是也自是益致力於糖米咖啡等貿易事業又十年而北加浪新嘉坡吧達維亞棉蘭泗水香港之日興分行先後成立民國三年八月歐戰事起所營業均在風雨飄搖中卒以擘畫周詳故能力支危局至民六積巨資逾千萬復以德意志潛艇禍損失幾於罄盡然名譽不稍失且以平日信用爲同業各大商家及外國各製糖廠各銀行家所推重爭起而援助之逾年復原狀又逾年而殖產之增加不啻倍蓰焉於是迺復慨然有志於祖國事業以爲寄人籬下終非久計以向所事界其公子欽書浴沂二君及三數當事人自於八年夏四月返國居廈門鼓浪嶼嗣是南游坭尼拉與李清泉君等創辦中興銀行北至滬上與史量才君等創辦中南銀行而滬日興行亦乘時而起廈門既設黃日興號復承辦電話公司關海線連鼓浪嶼收回某國人原有之數設權更與黃世金君等創辦廈門自來水公司國內僑商挾資千百萬者比比而是然大抵樂不思蜀回華振興實業之說時盈吾人耳鼓然往往徒聞其語未見其人實心眷宗邦愛祖國如先生者蓋不多見也先生性銳敏富毅力失敗之時不稍銜成功而後不自滿生平無他嗜好惟對於商業上事務紛集之頃輒抖擻精神奮鬥從事以爲樂又其爲人勇於爲義虛己下人凡海內外公益事業恆慨捐巨款無少吝各地方人士以此樂道之奉母蕭太夫人遺命於樓霞鄉設慈善醫院及斗南小學校師範講習所又其著也民國以來疊奉大總統題贈勳教勸學急公好義等匾額並授二等大綬寶光嘉禾章然黃君澹然不以爲榮也

程霖生先生肖像



程霖生先生小傳

程先生名源銓號齡孫一字霖生皖省歙邑人也父謹軒公母吳太夫人幼卽見背兄弟三人兄友興弟掄孫亦均早世先生其仲也讀書神敏目洞數行性喜博覽涉獵羣籍旁及醫卜星相諸子百家九流三教之書無一不窺而尤精於堪輿青烏之術光緒末葉策名登仕以道員指分直隸歷任京內外要差民國以還歷充安徽軍民兩署高等顧問總統府顧問十一年授鑲藍旗蒙古都統十二年特任督辦蚌埠商埠事宜先生以壯年英俊翱翔仕途敷歷中外當軸者咸爲心折段合肥尤激賞之許爲同鄉中後起之秀乃先生傲骨嶙峋高尚其志不躋權要之門恥爲俗吏之折腰日常卜居海上有園林花木之勝時花讀書以自怡悅才既博雅性復好古金石書畫嗜之若命精於鑒別目光如月市買不能欺三代鼎彝古綠斑斕盎然一室其收藏之富項墨林錢虞山不能專美於前喜愛文士故往來者多鴻碩日夕抵掌高談別有天趣云

傅品圭先生肖像



傅品圭先生小傳

傅先生名瑞鑫字品圭浙江鎮海人
才華卓越一如其尊人筱庵先生幼
肄業於上海南洋公學每試輒冠其
儕尤長於英語卒業後即佐其尊人
經營各種事業遂具有豐富之經驗
年十九歲即創辦五金號營業鼎盛
爲上海五金業之冠旋爲上海五金
業公會發起人先生於銀行學亦具
有心得於銀行界占有重望曾任上
海亞細亞銀行華總經理至其他事
業則曾任上海自來水公司董事招
商局祕書美國鈔票公司駐滬經理
會著有成績云

曾農髯先生肖像



曾農髯先生小傳

曾先生名熙字子緝一字士元號農髯湖南衡陽人少孤事母以孝聞少遊武岡鄧彌之先生門稱高第光緒甲午科成進士特旨授兵部主事遭拳匪之亂先生負母問道走天津三日狂行數百里踵趾皆穿自是絕意進取奉母居長沙日以作書自娛會巡撫陳寶箴創辦新學檄先生與熊希齡譚延闓各署監督而先生任事尤久衡湘子弟強半皆先生門下士也國變後杜門不出已而李梅龔易名清道人鬻書海上頗享盛名有乞書者梅龔輒蹙額曰吾書何足道吾友曾子緝斯當代蔡中郎耳乃貽書招之先生亦欣然報可自是海上談書者有南北二派北派以梅龔爲宗自鄭文公二爨以上窺鐘鼎古籀南派以先生爲魁自瘞鶴銘張黑女以力追中郎太傅唐宋而下不足道也先生於兩漢六朝碑版無不臨摩而尤得力於夏承燾以臨本影印示人見者靡不嘆爲伯喈復生間作山水意境在八大清湘之間蓋其身世有相似者乎生與梅龔交最契梅龔歿後先生爲經紀其喪葬之南京牛首山下每歲僕僕滬寧道憑弔遺阡歛獻流涕若不自勝其篤於故誼如此先生今年逾七十鬚髯飄拂望之如神仙中人海上後生載酒問字者不下數十人而張善孖季爰江萬平一平百平朱大可姚雲江其尤著者云

葉譽虎先生肖像



葉譽虎先生小傳

葉先生名恭綽字譽虎一字玉父近號澗菴廣東番禺人祖籍浙江餘姚祖南雷先生爲有清一代文學大師先生幼承家學文采斐然弱冠貢入京師大學堂聲譽益起卒業後歷主湖北各學校講席旋以長沙張公百熙召入郵傳部勤于職務爲諸曹冠遂矢志委身交通事業收回京漢鐵路卽其成績之一也辛亥武漢倡義先生去官奔走南北和議甚力民國成立袁項城任以諸要職皆不就自願任路政司司長時孫中山先生至北京與君談鐵路事甚洽極相推重先生至滬孫先生爲特開大會迎之孫先生鐵路計畫先生多所參助自是海歷局長次長者數年項城逝世黃陂繼任張勳以定武軍叛於京師段芝泉督師馬廠軍事運輸悉出先生規畫旋仍任交通部次長七年以借日本款事與當局意見不合辭職赴歐洲考察戰後狀況各國重其才望以上賓之禮禮之日美尤爲殊異所至之地朝野傾襟倒屣焉次年返國任勸辦實業專使旋任交通部總長未幾辭職十二年孫先生在粵組織大元帥府以夙重先生特任爲財政部長旋派駐滬任接洽各方時方南北一致反曹甚力先生多所斡旋規畫十三年直系戰敗南北構和段氏被推爲執政先生復任交通部總長旋因孫先生謝世段派于孫先生政策根本不能接受先生知事無可爲遂因病引去先生久任交通中國現代屈指鐵道專家當以先生爲第一人然于財政經濟外交社會各問題無不精心研究故發爲論議精密洞達一時無兩所著交通救國論風行海內外會再版數次平居愛才若渴手拔專門之士不下數百人有一藝之長無不薦引復好文學及考古學主以新方法引發明我國固有之文化蔡子民以事不克主北大國學館曾推先生代理學府翕然又最熱心教育手創扶輪等中小學校凡五十餘所曾一任交通大學校長多所維持改革至今成規勿替先生被服儒素湛深佛學不食肉已十年歐陽竟無辦支那內學院諱閉法師辦觀宗學社皆深賴先生助力近來居滬于社會事業多所贊助暇則以觀書讀畫自怡藝術界中人于先生亦極佩仰云

葉惠鈞先生肖像



葉惠鈞先生小傳

葉先生名增銘號惠鈞上海人少聞孫中山先生創革命欣然慕之前清光緒廿四年上海商團成立先生被舉為會長三十一年又被舉為商團公會會長蓋先生以為革命非藉武力不為功故於商團之組織奔走尤力宣統三年春先生正式加入同盟會並與沈縵雲君組織愛國會暨全國商團聯合會均被舉為會長是年八月武漢舉義先生與李平書陳英士沈縵雲諸君謀響應九月十三日督率團員進攻製造局鏖戰一晝夜克之上海遂宣告光復矣滬軍都督府成立被推為臨時軍政司令辦理地方防務民元元旦中山先生就臨時大總統先生率團員三百人衛送入都被任通阜司鐵道部長旋當選上海地方自治會議員及縣參事員二年自治會取銷任上海製造局總稽查兼材料處處長時大總統袁世凱陰謀稱帝國民黨討之不克先生夙有功於黨袁令通緝嗾上海鎮守使鄭汝成以五千金購之先生不獲已東渡日本遍攬扶桑三島之勝後回大連尋袁氏敗始返滬任總商會縣商會董事及陳列所主任公斷處委員等職民八組織雜糧公會即被舉為會長民九又被舉為豆米業公會董事十二年自治會恢復續任議員是年六月曹錕嗾使部下追逐黎氏以賄當選為總統又與總商會諸君組織民治委員會通電反對南京路慘案發生先生組織委員會力與帝國主義者相抗外人威焰乃為之稍殺十六年冬上海特別市參事會成立先生被聘任參事至十八年秋改任市政府建設討論會委員又同年總商會改組商會中央黨部指定先生為委員且當選為常務委員兼陳列所主任是年秋江蘇寧滬市縣米業聯合會成立當選常委又任外交部討論會委員市黨部勞工醫院財務員市政府滬南區保衛團團正先生為人見義勇為不畏強禦好面折人之短人或以此忌之然特躬廉潔一介不妄取歷任軍政商要職蕭然猶有儒素之風吁亦賢已

葉山濤先生肖像



葉山濤先生小傳

葉先生名壽春字山濤浙江海甯人也讀書少穎悟執筆爲文斐然成章適以丁外艱未與試怵儒冠之誤人棄筆研而從事於商遂襍被來海上學識既明通故億中有天材且操守尤謹嚴守身皎潔如白玉浙省巨商如劉君忱如等咸推重而禮敬之遇事仰成焉先生既以信用卓著爲實業界所欽企如華豐麵粉公司伍佑太和鹽墾公司等均爭聘爲董事先生性和易而敦厚待人接物從無疾言遽色又遇事謙退不慣與人較錙銖凡從之遊者如入春風之室雖棄讀而商仍恂恂然有儒者氣象事業愈恢闊態度愈謙下無論識與不識一言及葉先生無不交口譽爲君子人也又樂善不倦以時調卹親友鄉里之貧乏者過卽淡忘不留於口復與黃君楚九等發起急救時疫醫院任爲院長頻年以來活人無算云

董綬金先生肖像



董綬金先生小傳

董先生名康字綬金江蘇武進人武進董氏代有聞人先生年二十卽成進士服官刑部民元先生東渡日本翌年回國民三被任爲大理院院長民六調任京師高等檢察廳檢察長民九秋復被任爲大理院院長未一月代理司法總長民十夏被任司法總長旋回任大理院院長並兼高等文官懲戒委員會委員長民十一被任爲內外債整理委員會委員長是年五月代理財政部長旋辭職赴歐美調查工商實業狀況民十四始回國旋被任爲國務總理先生歿歷政界垂二十年以迴翔於法界之日爲最久成績亦最優曾充法典編纂處處長法律討論委員會委員長現行之民刑訴訟法及其他各種法律多爲先生之所起草手定者論其資格實爲法界之泰斗年來退隱海上仍操律師業以自娛云



鄔志豪先生小傳

鄔先生志豪浙江奉化人世業商先生幼而穎悟有神童之目肄業於槐蔭書院年十二卽能博覽經史性情慷慨嘗謂大丈夫處世當致力於社會有所貢獻於國家年十六尊人棄養力承先志以國內實業不振經濟瀕於危迫遂棄筆硯而營商業專以提倡國貨改良絲織品爲己任在江浙兩省創辦綢緞皮貨衣服商號凡十一處極力維持國產抵制舶品成敗利鈍轉在所不計也先生既富於愛國心尤富於慈善心具濟困扶危之志不論本省及別省一罹水旱兵燹諸災一視同仁救濟不遺餘力年三十九前黎大總統元洪頒給四等嘉禾章旋被舉爲奉化縣商會正會長歷任上寶農工銀行監察上海福建路聯合會正會長暨甯波旅滬同鄉會理事蓋道德既孚人望遂爭屬焉滬上重要團體或舉爲會長或舉爲董事均不辭勞瘁克盡厥職又素抱和平主義竭力運動和平對於奉化本邑公共義舉尤竭忱贊助治水利植森林興學校修道路慨然解囊無吝色其素願不置私人田產嘗與友云凡取之於社會者仍當用之於社會旨哉斯言誠不愧爲達人矣

楊少川先生肖像



楊少川先生小傳

楊先生晟字少川廣東東莞人童年卽具大志旋赴日本留學未幾回國入北京同文館肄業在校勤奮向學每試輒冠其儕爲校師所器重畢業後任農工商部僑務專員旋奉命派赴德國學習法政及陸軍光緒二十年回國任京師大學堂教習兼軍機處文書股英文繙譯官自此名聞政界矣庚子義和團起事離京道經濟南時袁前故總統世凱巡撫山東聞其才委辦魯省外交鐵路鑛務諸事擘畫精詳深資臂助嗣改任山東巡警道頗著能聲旋奉命出使德意志荷屬奧大利等國會以太夫人棄養辭官回籍讀禮三年服闋充兩江督署軍事總參議辛亥武漢起義共和告成被命爲山東警務處外交科長不久簡任滬海道尹兼外交部特派江蘇交涉員授二等大綬嘉禾章二等文虎章旋晉二等寶光嘉禾章先生目光遠大知宦海之不可久居故卸職後在上海從事商業頗具熱心曾組織國貨維持會工商業討論會咸被推爲會長民十奉派爲考察南洋華僑專使先生敬愛桑梓熱忱慈善事業是以廣東同鄉會及其他各慈善機關均爭相引重云

楊梅南先生肖像



楊梅南先生小傳

楊先生枝字梅南廣東中山縣人光緒十四年來滬服務於太古洋行航務部任事忠實勞動卓著民國初元任太古芝罘分行經理居青島者六年聲華鶴起爲各界所推重歷任膠濟鐵路委員芝罘工部局委員芝罘商會董事芝罘青年會及芝罘拒毒會名譽總董民國七年奉調回滬任太古行船務部華總經理上海總商會因先生習於商事經驗選爲會員交通部因先生富於航政智識聘爲顧問先生又篤於鄉誼勇於爲善廣肇公所及華洋義賑會均聘爲董事云

楊潤之先生肖像



楊潤之先生小傳

楊先生名國樞字潤之粵人幼時赴美
留學不幸抱病而歸旋復東渡日本求
學考入明治大學法科習法律得辯護
士學位回國後出而從政以知府分發
奉天旋回滬受任會審公堂總繙譯供
職五年民五民六之交任外交辦事處
秘書長民七春以縣知事分發江蘇前
大總統馮國璋聘爲法律顧問民十四
復應江蘇交涉公署法律顧問之聘民
十七授四等嘉禾章先生生有俊才最擅
長於法律及外交故到處爭迎近年治
律於海上洞明法意力障人權風采隱
然蓋律師界之秀出者也

榮宗敬先生肖像



榮宗敬先生小傳

榮先生名宗錦字宗敬江蘇無錫開原鄉人弱冠旅滬經商於南市設錢肆見吾國生齒日繁慨然以振興實業爲己任以最難解決者莫如衣食問題爰輟錢業壹意創辦麵粉廠及紡織廠距今三十年手創麵粉廠凡十二紡織廠凡七幾經艱難困苦勇往直前不少顧慮粉紗行銷國內外與舶來品抗衡識者謂吾國實業家首推南通張氏而魄力之偉大與夫營業範圍之廣無錫榮氏有過之無不及焉先生於實業既兢兢致意於地方公益事尤努力不肯後人如興辦學校開闢馬路等事所費不貲其手闢之梅園已成江南名勝發展太湖風景猶在計畫中蓋先生素以社會國家爲重其經營紗粉兩業直接間接之資以生活者無慮數十萬人與彼行商居賈逐什一之利者固不可同日語也又如於本公司設立同仁儲蓄部於中央銀行任董事本其三十年前錢業經驗以謀社會國家之福利心精力果實事求是先生有焉先生有弟曰德生練達厚重鄉里稱賢能協助其兄信乎南通昆季不能專美於前而先生之事業與日俱進未可以目前所成就者限之矣

趙晉卿先生肖像



趙晉卿先生小傳

趙先生名錫恩字晉卿江蘇上海人生而穎異富於識見弱冠畢業南洋公學光緒二十八年奉派大通郵政局主任翌年以親老辭改就上海廣學會百科全書經理嗣是歷任各商行公司經理聲譽之隆與日俱進旋用同知分發浙江辛亥鼎革之際先生目覩國內捲烟之盛銷倡議創設菸酒牌照以開稅源雖一時格於時局未見施行然其後菸酒捐稅次第徵收國家歲入恃為大宗論者莫不欽服先生之卓見焉民國三年出任江浙兩省公債董事京外當局知先生識略冠時爭相羅致若國務院若內務部若農商部若浙江巡按使公署若山東省長公署若全國捲菸稅總局若膠濟商埠督辦公署皆以先生為之顧問獻可替否匡贊居多十一年特簡為太平洋商業會議專使十三年上海各法團建議收回租界會審公堂公推先生為代表折衝尊俎卒底於成初租界會審公堂往往左袒外籍律師賴先生之力中國律師始得揚眉吐氣於其間收回領判權實以此為嚆矢先生在滬任總商會會董最久轉而為常務委員為主席商界各業翕然推服其他公益之事則有公共租界工部局華人董事滙浦局華人董事青年會會長全國青年協會副會長全國交通會議代表教育之事則有滬江光華中央醫科大夏同等大學董事商業之事則有浦東電氣公司同益銀公司洽豐地產公司等董事蓋先生夙著醫財有似子貢而學優則仕又似冉求益以識見洞達才具敏練故措之無不裕如十六年國民軍奠定南邦財政部聘為經濟委員會及勸募公債委員會委員復被任為上海特別市參事十七年簡為工商部商業司長未就任當局將以次長界之先生因滬事羈絆婉辭謝却遂派充工商部中華國貨展覽會主席旋改工商部駐滬辦事處處長兼工商訪問局局長今年甫四十有七云

趙芹波先生肖像



趙芹波先生小傳

趙先生名鴻藻字芹波江蘇上海人前清即以通判筮仕浙江歷辦浙江福建順直等省賑捐並歷充地方自治上海縣市議員元辦理上海曹家渡稅務分所主任滬寧鐵路貨物稅所主任三年秋任中國紅十字會上海總辦事處理事長七年夏兼任淞滬防疫事宜是年秋並由湖北省長聘充湖北義賑會駐滬主任九年任上海護軍使署諮議十年任浙江菸酒事務局二區事務是年由內務部列保以薦任職分浙任用十二年被舉為華洋義賑會會員十四年遊鄂任湖北省長公署諮議湖北財政廳財政諮議十五年返滬任上海稅所大場日暉港等處主任旋升任上海稅務所長十八年任浙江蕭山統捐局局長先生生平持躬勤慎待人忠厚實事求是淡於利祿數歷蘇浙鄂三省歷任要職雖屢辦稅務而志不擾民故清寒一如曩昔歷辦賑捐及紅會等慈善事業尤實心救濟災民涓滴不肯浪費為朝野所欽企曾歷授五等文虎四等嘉禾章並由前大總統頒給救濟為懷匾額論者謂先生於賑務陰德甚厚子孫必昌其長公子曾珏年僅二九為南洋大學無線電專科高材生畢業授學士位曾先後赴英國茂偉電機廠德國西門子德律風根無線電廠實習又赴美國入哈佛大學得碩士位歷任交通部電業科科員浙江大學工學院副教授浙江廣佈無線電台台長次公子曾和今年十八歲南洋模範中學畢業現轉鐵道部交通大學預科肄業英英挺秀正方與未艾云

褚民誼先生肖像



褚民誼先生小傳

褚先生名民誼浙江吳興人累世皆以儒醫名先生幼時其尊人杏田先生鑑於中醫之空疎命之習英文從美人柏樂文遊既而又入明理學塾溥溪公學攻中西文及數理化學每試輒冠其曹時清廷紀綱不振國事日非先生以一少年力倡種族革命自號曰明遺民誼其後所更也鄉人張靜江先生聞而重之資之游學日本習政治經濟諸學學成歸國偕張先生赴法與吳稚暉蔡子民李石曾諸公合創世界畫報及新世紀等報鼓吹宗教政治社會革命並出其緒餘辦理華僑公益事宜而尤注意於教育後此中法中比兩大學之成立實權輿於是時也迨武昌首義故國重光先生偕張溥泉先生返國掌上海同盟會總機關事元年冬再赴法入北京自由大學洎歐戰起又東歸偕李協和先生走南洋主某報筆政致力實際革命工作旋又偕靜江先生有事於日本四年秋三次赴法時國人得留法法倫學會之介紹渡法求學者日衆先生與李石曾蔡子民汪精衛吳稚暉諸先生組織法華教育會八年籌設里昂中法大學蔡汪吳三先生倡之於國內先生與石曾先生應之於海外已而石曾先生東歸悉以其事付之先生鳩工庀材從事建築未幾而中國首創之海外大學遂告開幕比國朝野聞而慕之北京大學教授蔡爾君等馳書商中比教育之協進遂與比國曉露槐工藝大學合組中比大學今中國學生寄宿舍已落成矣凡此海外大學之成立非先生之力蓋不至此也先生長中法大學一年赴史太師埠研究醫藥之學以爲我國醫學雖陳腐而藥材實珍貴欲以西法提煉中藥嗣又研究組織學作免除期變論得醫學博士及藥學士學位翌年返國任教育行政委員兼廣東大學校長視事年餘成績斐然中國國民黨第二次全國代表大會被選爲候補中央執行委員東征軍出發任軍醫處處長北伐時任總司令部後方軍醫處處長隨軍出發經歷皖贛湘鄂江浙等省救死扶傷不遑寧處十六年長上海中法工業專門學校十七年中央第四次會議開會選補委員國民政府特派赴歐調查衛生事宜凡歷瑞士南德法比諸邦輻軒所至備受歡迎並在各大學演講中國國民黨歷史及國民政府政策歐西人士之得恍然於我國黨政之真相者先生力也歸國後任衛生建設委員會主席教育部大學委員會委員等職然於奔走國事之餘尤好提倡體育組織中國國術協會發明太極拳推手器械以科學的原理製爲器械而運用之於國術者當以先生爲第一人又集合醫藥界同志發行醫藥評論正言讜論實事求是讀者無不佩其用心近擬設立細菌學院不久亦可見諸實行綜計君之一生所供獻於黨國社會者甚大而其堅強之體格偉大之精神尤足令人景慕無已云

聞蘭亭先生肖像



聞蘭亭先生小傳

聞先生蘭亭江蘇武進人也幼讀書有宿慧洞觀大義以世諦文字不屑學去而爲商業綿紗能周知世界大勢有遠大之眼光以上海一埠爲華洋交易之中心須有平亭市價之機關方足以調劑商情平準貨價先是日人有上海取引所之設而我華商竟無所組織太阿之柄不免倒持先生惄然憂之遂與虞先生洽卿等發起證券物品交易所以挽回權利先生被選爲常務理事今垂十餘年矣治事嚴正衆情翕服中間曾經風潮之震撼先生持以定力轉危爲安至今屹然不搖基礎益固先生之道德才識商界多引以爲重故又兼任紗業公所董事交易所聯合會會長上海特別市商整會執行委員江蘇省商會聯合會常務委員全國商會聯合會執行委員先生生平守身治事公正而嚴毅然不涉於苛細故人畏之而復愛之晚年皈心佛乘近來各處廟產頗受外界摧殘先生維護三寶不遺餘力誠不愧爲擔荷如來家業之龍象也

劉鴻生先生肖像



劉鴻生先生小傳

劉先生名克定字鴻生浙之定海人今年四十有二歲以五月五日生故老相傳凡端午日生者其人必端正而聰明剛嚴而辟惡先生七歲而孤幼讀於私塾專攻漢文時海禁大開外國語文爲應世必需之具遂考入楚王渡聖約翰大學肄業在校以勤學好勝著每作一事必期其成君之字典上殆無難字其堅毅進取自幼已然宜其能樹家業而立名譽也以迫於家境中途輟學以謀升斗初入工部局爲繕譯如鴟鵂之困於藩籬未能展翅旋入開灤礦務局始得稍舒其羽翼辦事忠勤大爲洋經理所信任遂得大展才猷開灤營業因而駸駸日上初設傳品處任先生爲華經理事業已成榮名已立然先生並不以此自滿深念中國民生之憔悴由於實業之不振出其餘資初辦鴻生火柴公司上海水泥公司中華煤球公司中華碼頭公司華豐搪磁廠裕華毛織廠等職工之賴以維持生計者數千竈先生識見宏遠又富於新思想以爲錢古名泉義取流通吾人旣衣食粗足當致力於民生以盡爲社會服務之道此所以日以發展實業引爲己責孟晉而不已也先生對於教育亦極注重嘗於其梓鄉出貲創立定海中學定海女子中學各一所此外學校亦多慷慨捐輸親友子弟之無力讀書者均助之培植古人所謂己達達人己立立人者先生蓋近之矣先生旣以熱心教育播於遐邇聖約翰母校聞之太爲敬仰特贈名譽法律博士學位以示欽崇先生於慈善事業亦盡量贊助每歲捐輸之款爲數甚巨又初辦定海醫院時濟醫院等以嘉惠病者此又先生天性仁慈急公好義之表示也生平秉性正直疾惡如仇朋友有過常面折之不肯阿附以誤人又重然諾尙信義人以此敬而重之在海上聞人中爲不可多得者焉

劉萬青先生肖像



劉萬青先生小傳

劉先生字萬青以字行湖北黃陂縣人也代以武功世其家累葉官勳彪炳江漢先生淵源家學少時彎弓盤馬富有尚武精神曾兩應武試旋以風會變易於十六歲時棄武而商光緒二十七年來海上經營出口事業志在流通國產於海外以挽回溢利其出品營業以牛羊皮爲大宗間亦兼營雜貨迄今垂三四十年蓋信孚中外焉曾經同業公推爲皮商公會會長又曾當選上海總商會董現仍爲會員先生既志在扶植中國國產以煤爲國產之精華勘得浙江長興地方有煤礦苗良而旺組合長興煤礦公司被舉爲總理購機施工從事開採出煤極佳乃齊盧之戰礦區適當其衝停工日久礦洞湮廢赴北京與政府交涉段執政時代允賠償二百萬圓未領分文而段去位上年國民政府派員加以整理當有恢復之希望也先生性慷慨熱心於公益慈善事業創議修建湖北會館並附築丙舍俾鄉人之旅滬者生者相扶助死者免暴露被舉爲湖北旅滬同鄉會會長餘如水旱災荒之賑濟衣材醫藥之施給蓋無役不從一時有劉善人之稱先生愛朋友重然諾顧有知人鑑不濫交朱公葆三海上商界之魁宿也獨與先生最相契合時以道義互切磋商風雨聯牀常忘晷刻朱公之捐館也先生臨其喪哭之慟有古人風誼云

劉少巖先生肖像



劉少巖先生小傳

劉先生名秉義字少巖浙江嘉興人其尊人蓉巖公爲上海著名木商先生幼讀書於梵王渡聖約翰大學授文學士學位旋赴漢經營商業武漢人士欽其績學咸以獲交爲幸與宋先生偉臣尤爲契合以飲料燃料兩宗爲人生日用之必需品遂與宋先生發起組織漢口既濟水電公司一切設計多出自先生手幾經艱困以底於成漢上居民胥受其惠無何宋先生以老退職先生繼任總經理仍兼任董事先生聲望之隆政商兩界咸傾向而倚重之兼任漢口總商會特別會董國民政府財政部顧問漢口特別市市政府參議公餘之暇尤樂於爲善漢口紅十字會及華洋義賑會均膺董事之聘云

劉山農先生肖像



劉山農先生小傳

劉先生榜名青字照藜諱名文玠字介玉比年嚮書海上別署天台山農海上人皆知爲山農先生不知其姓劉更不知其名與字也原籍黃巖隨宦至禾遂家焉人子華公世襲雲騎尉授嘉標城守府以捕匪積勞咯血而逝先生少孤家貧幼學賴母周太夫人教養成立八九齡卽能作擘窠大字筆力遒健逾於成人稍長益刻苦向學每試輒列前茅年十九游泮水受知於曲園老人及疆邨詞人禾中者宿皆折輩行與之交已而清廷憤國勢不張詔各省編練新軍先生慨然曰班定遠投筆從戎此其時矣適陸中丞元鼎撫蘇電招入幕辦理陸軍徵兵案件先生好學成性從政之餘猶不廢讀先後畢業於江蘇法政及高等巡警學堂歷充督練公所文案武備學堂教習暨四十五標書記軍需官二十三協軍法軍械官等職辛亥革命聯軍攻寧先生任第五師參謀兼水陸各軍總軍需躬赴前敵雄冠劍佩策馬巡行秣陵關雨花台諸壘戎馬書生意氣豪甚寧城既克擢江北護軍使署秘書長兼警察局長旋調軍法司長然先生鑑於驍兵悍帥之漸不可制承平未知何時遂於甲寅春毅然棄職歸天台故鄉隱居藝橘現市上所贈炙人口之天台山蜜橘者卽先生十年手植之成績也時復往來滬上爲人作書持纜素來乞書者戶限爲穿海上巨室凡不獲先生書者環堵間黯然無色必輟轉求得之而後已先生之書少學東坡吳興中年改習鄭文公參以張猛龍張黑女慈鶴銘雄渾剛健與李梅庵會農韓鼎足天下間效尤西堂爲俳諧文以嘲世諷時皆署曰天台山農一時見者無不歎服新開界尤爭相聘致以爲引重先後任新開新申各報撰述編輯近年時有心胃之疾以禾中舊有敵廬葺爲農圃作習靜養病之所蒔花種竹若將老焉蓋先生天懷灑定風趣盎然宜其書法之克享盛譽也先生有外甥朱大可君秀水人績學能文有小朱十之稱亦以書法稱於海內云

樂振葆先生肖像



樂振葆先生小傳

樂先生名俊寶字振葆浙江鄞縣人父麗水公經商於滬設泰昌洋貨木器號先生幼多疾疾九歲始就外傳十六歲即來滬入泰昌學爲買暇輒喜誦唐詩積久漸能吟詠語句清新蓋天才也無何麗水公捐館舍泰昌號即由先生繼續經理今已三十載矣蓋自麗水公辦迄今已閱六十年滬上商店年齡之久資格之深泰昌殆首屈一指焉先生生平善與歐美紳商交游貿易往還日相狎習既熟諳其語言文字復規做其機巧技術故泰昌所製器用率精以澤一几一案莫不匠心獨運他肆莫與抗衡洋場百里以內名公邸舍几榻陳設非泰昌不能愜意因而營業日盛聲望日隆歷任上海總商會董洋貨九業公會總董上海熒昌火柴公司董事長三友實業社董事長振華油漆公司董事長又兩任甯紹輪船公司董事長又煤業銀行恆利銀行董事又閩北水電公司經濟科董事丙辰年曾任上海總商會赴日考察實業團團員得彼邦人士盛大之歡迎詩酒酬答譽滿東瀛先生秉性慈祥喜作公益曾於民國十四年在鄞縣故里寶幢地方獨資辦寶林學校費六萬餘金今年又在故鄉辦寶林醫院募捐建築已有端倪故鄉去所居五里有太白橋歲久傾陔先生釀資改築歷時月躬自往返監工上海甯波同鄉會由先生發起購地建築會所又曾爲四明公所募捐建造南北兩廠及建築四明醫院並歷任同鄉會公所醫院董事壬戌癸亥江浙水災受任爲華洋義賑會董他如婦孺救濟會紅十字會公立醫院謙益傷科醫院均擔任董事性喜成人之美凡有一節之善一藝之長爲之授事爲之擇業親戚故舊及鄉人求作薦保者無不允先後不下數百人因而賠累損失至十餘萬金未嘗介介於懷待友忠誠懇直知無不言言無不盡誠當代之厚德君子也

厲樹雄先生肖像



厲樹雄先生小傳

厲先生名汝熊字樹雄浙江定海人也曾祖白華山人以詩名於時乃兄汝燕留學英國習航空實爲中國飛行家之第一人先生幼攻書史聰穎過人未幾棄儒而商中華民國紀元先生來春申銳志商業頗爲名公鉅子所器重民國五年奉農商部派充美國商業觀光團團員時適舊金山開萬國博覽會先生曾赴各國工商陳列館及各地工商實業機關悉心考察回國後任江西地產營業公司總經理上海華孚商業銀行行長蕪湖電話公司總經理厲氏兄弟公司經理民國七年在甯波原籍創設電話公司初時用戶僅有二百餘家今則蒸蒸日上已逾數千并創辦丹陽電燈公司兩公司之經理均先生兼任之又任上海物品交易所董事煤礦公司及聯華銀行董事先生除經營商業外對於社會事業頗具熱心故如甯波旅滬同鄉會閩北慈善團寰球中國學生會咸推爲理事等職又爲上海總商會及聯華總會會員先生常以中國實業衰落非設一鉅大雄厚之公司不足以資發展因於民國九年鳩合同志幾經討論遂有豐盛實業公司之設先生被舉爲副董事長兼副經理先生貌秀美恂恂儒雅又善詞令工社交海上人士無論識與不識莫不想望丰采云

談丹崖先生肖像



談丹崖先生小傳

談先生名荔孫字丹崖江蘇無錫人由政府派送日本留學肄業於日本高等商業學校卒業後在日本銀行界實習銀行事務宣統元年歸國充南京高等商業學校教務長三年來京入度支部嗣入大清銀行充稽核革命後官南京臨時政府財政部管理軍用鈔票事宜南北統一大清銀行改爲中國銀行任計算局局長以改良簿記爲己任今中國各銀行均改用新式簿記者皆先生手創之力也嗣調國庫局局長民三調充南京中國銀行行長時金融紊亂中交鈔票奉令停止兌現惟先生抗衆議維持鈔票信用致停兌者祇北京一處嗣奉調充北京中國銀行行長民九辭職創辦大陸銀行資本五百萬元設總行於天津並於北京漢口上海南京蘇州濟南青島滕縣等處設分支行專營商業往來及國內外匯兌各種存款常有數千萬元足徵信用之優魄力之厚附設儲蓄部兼營保管事業天津上海兩處設有洋灰鉄肋保管庫並出租美國保險履儲蓄部所用之儲蓄盒係在芝加哥製造年來國內銀團聯合投資事業先生每樂爲之提倡將來建設時期大陸銀行對於國內工商業之發展定能以實力爲之補助也

錢新之先生肖像



錢新之先生小傳

錢先生名永銘字新之浙江吳興人弱冠負笈東渡日本肄業神戶高等商業學校以最優等畢業歸國後從事銀行事業任交通銀行上海分行經理被選爲上海銀行公會副會長及上海總商會董未幾改任交通銀行總行協理兼任北京銀行公會董事上海浙江地方實業銀行董事及蒙藏銀行董事先生雖專辦銀行事業然於各種實業亦提倡不遺餘力嘗任上海泰山磚瓦公司監理華豐紗廠董事及寶通電氣廠董事先生又慨念教育爲立國之本本其熱忱助之發展頗爲教育界所推重故又嘗爲東南大學暨南大學上海商科大學法科大學及中華職業教育會董事政府嘉先生熱心公益提倡實業振興教育之功特於九年授三等嘉禾章明年晉三等文虎章三等寶光嘉禾章十二年派爲財政整理會委員十六年國民政府成立以中樞度支百端待理非得諳練財政且於金融界夙負人望者不足以勝斯任遂命先生署財政次長翌年浙省財廳長盧懸先生應浙人之請又長浙財廳長在浙兩年當軍閥搜括之餘地方荒歉之後力主與民休養之策以故近時各省財政惟浙省成績爲最可觀云

穆蕩初先生肖像



穆蕩初先生小傳

穆先生名湘明字蕩初江蘇上海人幼讀於私塾聰慧倍常兒年十四奉父命營棉業凡八年年二十二始習英文越三年供職海關又六年任龍門師範學監旋任蘇路警務處長然先生終以未嘗留學歐美爲憾平居孳孳研求英文年三十四遂自費留美初入威士康新大學習農科轉入伊里諾大學受學士位復在塔克塞司農工專校習棉業受科學碩士位年三十九始返國從事棉業不遺餘力旋集資本二十萬金創設德大紗廠用英機紡紗中國棉紗之有四十二支紗自德大始不數年資產增至一百五十萬先生力也先生又爲改良棉種起見設立試驗場專種美棉廣散種子自上海推而至於南通南京鄭州保定唐山各地自是美棉咸行於中土民國五年先生在上海創設厚生紗廠資本二百萬越二年又在鄭州創設豫豐紗廠資本如厚生之數九年先生創設中華勸工銀行資本百萬又爲平準市價起見創設華商紗布交易所資本三百萬此皆先生建樹於中國企業界之卓卓者也十八年國民政府成立以先生才學豐贍且於工商業確有建設遂以工商部次長一席相委行見先生將以改良紗業者改良各業發展上海者發展全國矣先生爲人和藹待人接物無疾言厲色且極敦信義與人期約時刻弗爽然自奉儉約大布之衣愉愉如也論者謂先生出入政商垂二十年猶能葆其學者風度信不虛也

盧鑑泉先生肖像



盧鑑泉先生小傳

盧先生名學溥字鑑泉浙江桐鄉縣人清光緒五年生歲壬寅以高第舉孝廉旋以知縣茲仕辛亥鼎革時在兩江督署任外交科長旋調北洋督署外交科長政體變更後任奉天教育廳祕書民元十月調任財政部祕書未幾代理公債司第一科科長民二改爲署理民三轉任外交事務經費局局長旋升任公債司司長歷年以來凡財政要政幾無役不與如民二編訂公債條例民三整理內國公債民四整理各項短期外債咸參訂有功焉民八被命代理財政次長民九被任爲內國公債局局長民十授二等寶光嘉禾章十二月實任財政次長民十一升任內國公債局副總裁自後倦於政治脫離財部從事銀行事業現任交通銀行總理云

黃延芳先生肖像



黃延芳先生小傳

黃先生延芳浙江鎮海縣人也生有異稟聰明過於常人鑒於二十世紀商戰時代非商業不足以救國乃專精壹意於商又以商務威衰之樞紐全握於運輸遂專門研究運輸事業會遨遊東西洋周列各邦所至調查其商業之狀況及運輸事業之組織歸而餉於國人故先生經商海上對於其他商業雖時亦旁鶩兼營然其畢生精力所萃之主要事業厥在運輸現任中華捷運公司總經理實為運輸界之老前輩云先生對於學識則務求其新而道德則務存其舊家庭課子以治經為先每言及近年學風不古道德破產輒慨然長太息者久之先生性慷慨尤喜文士常樂賑濟寒畯謂此輩乃吾中華國粹再歷數十年將求之不可復得當與天下共珍惜之持論如此其丰采可想見矣

關網之先生肖像



關網之先生小傳

關先生名炯字網之湖北漢陽人漢壽亭侯之裔也先世由荊州移居漢陽代有聞人尊人季華公以名孝廉而為名儒為學主躬行實踐學者尊為漢陽先生君少受書於博文書院年十七游洋十八應鄉試聞父病輟試遠歸父已易簀大懼不克負荷益試力於中西有用之學首辦湖北民辦中學及速成學堂風聲不著學者稱為小漢陽先生歲壬寅領鄉薦以同知筮仕江蘇大府以其學貫中西命權上海會審公堂小試其鋒聲譽騰起尋擢知府徐東海為東督以關外缺外交才專摺奏調奉旨俞允領團閩之恐失賢職員電政府攀留不果行旋調署南通直隸州吏畏民懷德政炳然尤以修築江堤至今遺愛在民時適樊樊山開藩蘇省曾於批答中譽為咸同以來鄂中人材後起之秀載樊山文集辛亥鼎革先生復領袖溫肅久於其任直至民十七始辭職先生三領滬歷時逾二十年以保持中國主權為職志案牘可考者無慮數十事尤以黎黃氏一案大關公堂最為膾炙人口政府嘉其功疊次褒獎並以簡任職存記意日德諸國政府均贈高級寶星先生素富革命思想領辟時保全黨人不可僕計國民政府近任先生為江蘇印花稅局副局長先生之人望實為中外所交孚於公益慈善事業尤見義勇為兼任湖北同鄉會會長紅十字會常務董事最近中西人士發起新民輔成會被選為董事兼副會長先生四十以後皈依佛教被選為佛教淨業社副社長中國佛教會執行兼常務委員上海特別市佛教會執行兼常務委員先生於佛典無所不窺而發願專修淨土勇猛精進嘗言雖我佛當前詔我以別有法門勝於淨土者我亦不吝此志云云其願力堅定若此決定往生萬牛莫挽矣

謝蘅窗先生肖像



謝蘅窗先生小傳

謝先生名天錫字蘅窗浙江鄞縣之梅墟人也幼而英俊不羣熟習
商事居常縱論實業興敗之由洞若觀火老成人聞之咸爲歎服嘗
言欲挽救中國必以實業爲前提欲振興實業必以煤鐵爲根本故
壹意萃其精神材力以從事於煤業先後創設裕昌煤號老永昌煤
號並在漢口南京無錫青島博山甯波通州等各埠徧設裕昌分號
兼任鄞樂大通柳江賈汪各煤礦公司董事漢冶萍煤鐵廠礦公司
監察上海煤炭總公所總董上海煤業公會會長先生經營煤業已
達三十九年中間屢躓屢興而先生堅毅鎮定力進不懈每語人曰
吾之營煤將以救國非肥家也先生在上海商界中資望極隆歷任
總商會會董華安保壽公司董事先生急公益好慈善每遇國內慈
善公益事業無役不從並在原籍梅墟地方設立求精兩等商業學
校並附設分校迄今已越廿年耗資十萬餘金其他如施捨醫藥收
埋暴露分給衣米施種牛痘諸事均歲以爲常云

韓玉麟先生肖像



韓玉麟先生小傳

韓先生名玉麟江蘇吳縣人少通英吉利文字遜清光緒三十年監運中國貨品至美國聖路易城展覽會遂入瓊斯商科大學肄業尤注意於運輸制度歸國後遂創中華捷運公司於上海是爲中國有運輸事業之始其後推廣之於滬甯滬杭甬津浦隴海各路及世界著名各埠凡中外商貨貿遷轉徙莫不利賴之先生復熱心於革命事業辛亥之役聯軍攻甯先生擔任運輸要職凡糧秣鎗重往來輸送皆悉心擘畫供應無缺事成敘勳得嘉禾章人或榮之而先生恬如也平日對於社會事業極力贊助歷任上海同仁醫院中國青年會上海青年會浸會中學等處董事凡以慈善之事請者無不慷慨資助然先生篤守基督教律一切嗜好皆所擯落刻苦儉約類有道者求之今日侈靡之上海若先生者誠鳳毛麟角矣

聶雲台先生肖像



聶雲台先生小傳

聶先生名其杰字雲台湖南長沙人聶仲芳中丞之公子也中丞曾任蘇松大道及江南製造局總辦中國之有鐵甲兵艦與十二英寸大砲中丞之功也先生生甫二周卽隨宦上海稍長延師授讀肄習英文旁及電化工程諸學皆能無師自通操英語極純熟年二十五從事棉業時上海有恆豐紗廠者有棧一萬五千營業不振虧損頗鉅先生鳩同志數人收買焉慘淡經營銳意整頓不出六年卽復贏利一躍爲中國之大紗廠工友增至千五百人且能以餘資在廠內辦學堂以惠工徒設免費學額獎勵士子留學廠中此外又辦紗廠數家民國六年上海華商以太平洋岸商人來華觀光亦組團體赴美遊歷以答之先生爲副團長抵美之日力勸美國棉業專家來華調查謀改良中國之棉業焉先生於經營綿業外尤熱心職業教育初試辦一職業學校頗有成績各省學生來學甚衆遂又辦一大規模之職業學校校內如製紗製鐵等工廠設備完全使學生人人實習以出品所得充經費先生對於工廠管理法工人衛生法均有心得泰西之短時間工作先生擬做行之民國八年創辦大中華紗廠繼發起華商紗廠聯合會先生生平致力於棉紗事業其功甚偉其他公益亦極熱心曾任工部局華顧問及教育委員啓明啓秀中西三女學校董復旦大學校董勸勵學會會長聯華總會會員前數年美國紅十字會在華募會員先生募得五千人美紅會贈以獎旗先生閑居時常以逸譯著述自娛會譯有無線電學及託爾司泰傳二書爲世所傳誦云

龐京周先生肖像



龐京周先生小傳

龐先生京周吳門之望族也幼延師讀性穎慧過目即成誦不喜經史偏向科學父老皆驚歎曰此子將來必爲新人材之傑出者九歲入蘇垣唐家巷兩等小學（斯時學校猶多以地爲名者）十三歲卒業入草橋中學辛亥入學生軍爲軍中年齡之最稚者民國二年先生十七歲入同濟大學（斯時猶稱德文學堂）是年冬赴日本養病兼習理化次年復入同濟民十畢業時年方二十五歲即任濟生醫院醫師及滬村甬鐵路醫官並在滬開業民十二任亞東醫大教授（即今之東南醫大）民十三任同德醫校教授翌年因校事零落校長盧席先生爲衆望所歸詢謀僉同公推先生繼任校長先生以醫校爲公益所關誼不容辭慨然擔任從而收拾殘局經營補苴至今蓋已六年校基金鞏固而光大焉先生以校事醫事朝夕無暇暮遂辭去鐵路醫官改任衛生顧問先生性樂善公衆事業趨之若鶩民十四與黃礎玖先生等創辦急救時疫醫院於今亦五稔矣先生於醫學攻內科臨診和平精審不厭求詳故著手輒愈行道未及十年而醫名已溢海上生平抱改革主義對於醫藥尤多所發明云

顧馨一先生肖像



顧馨一先生小傳

顧先生名履桂字馨一以字行江蘇上海人曾祖諱有濟祖諱宗愷父諱福基並以績學能文爲邑推重先生兄弟五人長兄出嗣二三四兄俱殤惟先生最幼時海上初開商埠商務之興一日千里福基公慨然曰吾家累世讀書會不免於凍餒曷令兒輩改習賢選乎遂俾先生習雜糧業已而先生自製機製麵粉廠碾米廠紗廠等經之營之業務大感而先生之聲譽亦遂卓卓於社會間前清光緒三十三年本邑倡辦自治先生被舉爲市議員又被舉爲總工程局南區區長宣統二年任總工程局董事及總商會縣商會議董民國元年任市政廳副市長縣商會會長兼貨物稅所長六年農商部獎勵實業呈請大總統特授四等嘉禾章並聘爲顧問八年晉授三等嘉禾章十五年任商埠督辦公署參事十六年國民軍奠定江浙特任先生爲財政委員會委員兼財政部勸募債券委員會主席市政府成立又聘先生爲參事十八年奉派爲特別市商人團體整理委員且互選爲常務委員此皆先生事業之榮華在人耳目者也至於先生三十年來歷任各慈善團救火會保衛團學校公司銀行董事委員等職蓋更僕難以數計然卽此以觀先生之盡力於桑梓與滬人士之仰望於馨才者亦不難見之矣先生有丈夫子六長服業老公茂洋行次留學德國得博士學位現任禮臣洋行華經理三服業匯豐銀行四五六肄業育才中學並頭角嶢嶸克荷父業先生今年已六十矣而聰明強健猶如四十許人我知稱觴之日芝蘭玉樹濟一堂先生顧之當亦爲之掀髯一笑也

龔景張先生肖像



龔景張先生小傳

龔先生名心銘字景張安徽合肥人光緒壬辰科進士授職翰林以庶常改職考取商部記名時奕劻父子柄國苞苴競進先生以薄貲投之觸怒載振奏劾落職遂絕意仕進耽金石書畫之學書得平原誠懸神髓收藏金石碑版尤富受知于常熟翁文恭公嘗歎曰入吾室者龔生也又與其姪孫斌孫書曰寄語景張老人墓誌銘必煩其手筆矣其為前輩引重如此少侍其尊人於金陵暇偕西人馬格里及介弟懷西徧攬江南北諸勝於浦口鎮北六十里得溫泉焉稽諸圖籍知為蕭梁昭明太子讀書處南唐韓熙載宋王安石孫覺秦觀參寥賀鑄皆嘗來遊越四十年乃買得之龔石引泉築室其間有終老之志焉先生娶於壽州孫氏為故大學士諱家稱猶女因常往來淮肥間獲得印子金數十枚其文曰穎曰郢曰陳曰專先生考其地皆屬戰國之楚因審為楚鏃而知沈存中淮南藥金之謬又獲秦量一有文曰大良造鞅先生考為商君遺製遂構周爰秦量之室一時名士之過從者留連風景摩挲古物投贈詩文哀然成帙先生輯之為浦口湯泉小志行於世近歲避亂僑居滬上然固無一日或忘情於泉上焉或謂先生以名公子為名翰林投老林泉優遊自得擬諸吾浙隨曲二園殆不多愧余曰不然合肥一邑今士大夫之輩北也鄉里小兒聲勢焜耀者何可指屈而先生獨矜懷故國絕迹貴遊有義熙處士之風兼河汾諸老之抱若僅僅以文人擬之殆淺之乎測先生矣

龔禮南先生肖像




龔禮南先生小傳

龔先生名湘字禮南福建閩侯縣人祖諱易圖前清進士以剿捻匪功官至廣東湖南布政使工詩善書畫海內所稱爲含真先生者也父諱銘義前清知府嘗設學校辦實業開閩省風氣之先先生少承家學復旁通英法諸國文字早歲卒業於巴黎政治專門學校外交科及巴黎大學法科得碩士學位復入海牙國際法大學院爲研究員歸國以後授法部主事勤敏謹飭長官倚之旋調國務院法制局編譯時民國肇造百度維新一切法令出先生之手爲多未幾又擢外交部秘書駐西班牙使館秘書駐法使館秘書駐和蘭阿姆斯特德坦領事駐和蘭代辦公使則又以蕭何定律之才而膺陸賈折衝之任矣先生從政之暇不廢講學居北平時北京大學朝陽大學高等警官學校俄文法政大學諸校皆先生曾執教鞭之地也凡經先生所口講指劃者其程度無不斐然可觀近自收回領司法權之議起上海公共租界暨法租界兩公廨會審官非得熟悉外交精通法律者不克勝任當局慎簡賢能遂畀先生以法公廨會審官之職蒞任以來哀矜折獄不特滬人士同戴其德即在法政府亦深重其才然則他日捧教槩以周旋於兩國之好者非先生其又孰任之哉

中華民國十九年五月出版

每冊價銀貳拾圓正



編輯者 海上名人傳編輯部

印刷者 上海文明書局

代售者 上海文明書局